



sc. sup. 20. pl. 4.







ANTI-THESIS
CONTRA
P. Fr. HYACINTHUM
SERRY

Prim. Theol. Patav.
conantem

*Pontificiam Infallibilitatem
certis terminis
circumscribere.*



AUCTORE
FRATRE ALOYSIO
MARIA LUCINO

Ord. Prædic. Commiss. Generali
S. OFFICII.

MEDIOLANI, Anno MDCCXXXVI.

Ex Prælis Agnelli SS. Inquisitionis Typographi
Superiorum permisso.

0123456789101112

1314151617181920

21222324252627282930

31323334353637383940

41424344454647484950

51525354555657585960

61626364656667686970

71727374757677787980

81828384858687888990

919293949596979899100

101102103104105106107108109110

111112113114115116117118119120

121122123124125126127128129130

131132133134135136137138139140

141142143144145146147148149150

151152153154155156157158159160

161162163164165166167168169170

3. A N T I - T H E S I S

CONTRA AUCTOREM CONANTEM

*Pontificiam Infallibilitatem certis terminis
circumscribere, ejusdemque propositi
iteratam defensionem.*

P R Æ L U D I U M.



Peruenit ad manus quædam
Dissertatio Apologetica nu-
peri Scriptoris Anonymi ad-
versus novissimum Privilegio-
rum Pontificiorum Vindicem,
typis Bartholomæi Giavarinæ
Venetiis publicata. Videram
eo inscriptam titulo: *Infalibilitatis Pon-
tificiæ justis terminis circumscriptæ explica-
tio, atque defensio*. Typis Colonienfibus
prostat: annum à mox elapso 1734. com-
putat. His autem non contentus aliam,
currentis anni 1735. elucubrationem pro-
mulgat sub expresso nomine Fratris Hya-
cinthi Serry, in qua prioris Dissertationis
molimina per iteratam defensionem explica-

re fusius ; atque urgere adpromittit . Quantum gaudii hauserim in promissa defensione Pontificii privilegii , eo tristius accepi in posterioribus verbis , ubi contenditur ad terminos eam coarctare . Justos equidem terminos assignare declarat ; sed undenam petendi sint , nullus percipio . Quamobrem mecum pugnabat animus , an iteratis vindiciis Privilegium hocce Romani Pontificis ab invecta circumscriptione defendere necesse foret ; vel Anonymum , & spectabilem Scriptorem ad editas vindicias remittere , ut ibi jam præoccupatas difficultates , & abunde enodatas inspiceret . Verum quia callide præfati tituli æquivocatio veritati plurimum obesse posset , hanc provinciam æquius amplectar , quo justior defensionem veritatis deposcit . Puto (ut scripsit (a) Augustinus) *nequaquam juste reprehendi ministerium nostrum , si contra quoslibet adversarios veritatis ferventi spiritu pro veritate certemus .*

§. I.

De disceptata quæstionis Cardine :

OMnino displicet indicata apologeticæ dissertationis analysis , qua declaratur infallibilitas Pontificia defensa & simul circumscripta . Neque juvat terminos justos nuncupare ; quum nefas sit terminos , aut legem ponere auctoritati , quæ Christum tantum auctorem agnoscit . Ille Deus homo , qui dixit : (a) *Data est mihi omnis potestas* ; Ille , inquam , indeficientiam judicii Petro concessurus fatus est : (b) *Et tu aliquando conversus confirma fratres tuos* . Et alibi , idem Magister , & Dominus Jesus Pontificium , qua late patet , Petro elargitur , ita eum alloquitur : (c) *Pasce agnos meos ; pasce oves meas* . Pluribus vindex Pontificiorum privilegiorum ostendit tum rationum momentis , tum Patrum perpetua Traditione , allatos textus intellectos , & habitos esse pro concessio Petro , & successoribus

A 3

ri-

(a) Matth. 28. 18.

(b) Luc. 22. 32.

(c) Jo: 21. 15. 17.

ribus Romanis Pontificibus infallibilitatis privilegio, quum pro munere, & officio docendi universam Ecclesiam (quod idem est, ac ex Cathedra loqui) definitiones in Fidei, morumque materia pronunciant. Nullum consensum sive prævium, sive posteriorem involuit, aut explicat textus evangelicus; nullum postulavit Antiquitas, nullum quoque Patrum traditio exegit, adeo ut per mille & amplius annos ignoraverit Catholicus quilibet dependentiam hanc Pontificiæ, imo ipsius Petri infallibilitatis ab alieno consensu.

Ipsi Hæretici, etiam in æstu pervicacioris contentionis, independentem, & absolutam infallibilitatem Papæ professi sunt. Etenim Ariani Eusebianæ factionis, una cum Conciliabulo Antiocheno, totum conatum, laboremque impenderunt, ut oraculum unius Julii PP. ad firmandam eorum sententiam præiret. Eadem vi, & fraude usi sunt, ut unius Liberii constantiam vincerent; rati, securo otio triumphare non posse, etsi fere totus mundus, duce Constantio Imperatore, in Arianismum propenderet, nisi Pontifex Romanus indefectibilitatis pondus unice adjecisset.

Quor-)

7

Quorsum tanta cura ? Quorsum tot studia , si a consensu Ecclesiæ veritas dogmatis inconcussa penderet ; vel firmitas judicii ab assensu alieno haberetur accepta , quum Papa pronunciat ? Noverant , velint , nolint , Hæretici Ariani pertinere ad Romanum Pontificem quæstiones de fide peremptorie definire , esto simul turpissime errarent , cogitantes , posse Papam hæresim , aut errorem ex Cathedra docere , & Arianam probare perfidiam . Et Liberius sibi probe conscius , nullatenus debere sive consilium , sive consensum , sive definitionem Concilii Ariminensis sequi , restitit petitioni , & illorum Patrum subscriptioni strenue est refragatus .

§. II.

Evasio præcluditur ;

Respondet Auctor eruditus (a) hæc omnia superius dicta , & jam ad satisfactionem vindicata , vehementer dignitati , auctoritatique Romanorum Pontificum plurimum laudis asferre , sed re æquius per-

specta, plus incommodi creare, projectique adulatoris speciem illum induere, qui jura Pontificia, ac privilegia nullis, quos ratio postulat, limitibus circumscribat.

Pudet probrum referre, quod eo maximum est, quo totam Romanam Ecclesiam appetit, Illam quidem Ecclesiam, quæ jura, ac privilegia Romani Pontificis proficitur, & pro aris, ac focis defendit, atque vindicat; quæ ut a Christo donata, ut in evangelico textu expressa, ac descripta amplectitur, mox præpostera intemperantium hominum commentaria deiciunt, enervant; quæ censuris, atque proscriptionibus theses, libros, & codices lædentes Pontificiam auctoritatem, vel attenuantem, una cum auctoribus perstringit, ferit, profligat: quæ infallibilitatem Papæ ex Cathedra pronunciantis absolutam agnoscit; independentem ab alieno assensu, ex necessitate absoluta quæsito, esse vult, & deprædicat; illam Ecclesiam adulationis crimine onerat, quam ipse participem Pontificiæ infallibilitatis facit, atque decantat. Quidni quoque hanc noxam affingat sacro Textui; Patrum Traditioni, sacratiorique Vetustati, quæ omni-

no ne civit terminis circumscribere indefectibilitatem Petri in judiciis ex Cathedra?

Ut ut sit : *Adulatio est fallaci laude seductio* : (a) teste Augustino, Idcirco falsa veris immiscendo deceptorum blandientis lenitudo se prodit, Agedum ; ubi vel ex qua parte cubet fallacia , deceptio , falsitas ? Ad ulteriora procedamus ,

§. III.

De adversantis intentionis argumento ;

Approbat Auctor in verbis Christi Domini : (b) *Rogavi pro te , ut non deficiat fides tua* , quibus infallibilitas iudicii Petro data creditur , nullam conditionem adjunctam legi , alienum consulentium consensum explicantem , Verum contendit , conditionem hanc omnino subintelligendam esse , quemadmodum in altero ejusdem Christi promisso Petro dato , per verba : *Tibi dabo claves* solvendi quodcumque super terram , ut sit solutum , & in coelis , non proinde absque conditione intel-

(a) Libr. 50. Hom. Hom. 20. c. 1.

(b) Pag. 48. n. 3. Et in iter. def. pag. 95. Et pag. 106.

telligendum esse, sed præhabitis in pœnitente dispositionibus necessariis ad fructum clavium percipiendum.

Apta sane paritas ad destruendum arguentis intentum. Vel ipsis Ethnicis patet, peccata non deleri nisi per pœnitentiam. Vel pueris compertum est, remissionem peccatorum postulare eorundem detestationem. Nil ferme explicatius, nil frequentius in sacris litteris, quam illud oraculum Jeremiæ: (a) *Hæc dicit Dominus Deus: Si converteris, convertam te.* Nil abundantius in Evangelio prædicatur, nisi illud: (b) *Pœnitentiam agite; & illud Christi: Si pœnitentiam non egeritis, omnes simul peribitis.* Et hæc est conditio abscondita, & implicita in data Petro facultate solvendi super terram, ut sit solutum, & in cœlis? Quod adeo perspicuum est, ut ipse Dominus Jesus edocens discipulos super usu parabolarum, dixerit: (c) *Vobis datum est nosse mysterium Regni Dei; illis autem, qui foris sunt, in parabolis omnia fiunt; ut videntes videant, & non videant:*
 & au-

(a) Cap. 15. 19.

(b) Marc. 13. 6.

(c) Marc. 4. 11.

Et audientes audiant, Et non intelligant: nequando convertantur, Et dimittantur eis peccata.

A contrario fluit nitide argumentum. Si constat, conditionem poenitentiae dispositionisque peccatoris ad obtinendam remissionem culpae, injectam fuisse in data facultate Petro solvendi super terram, & in coelis, cum adjicienda est conditio omnino arbitraria requisiti assensus, consiliique alieni a verbis Christi donantis Petro infallibilitatis privilegium; quum nullibi neque in veteri, neque in novo testamento vestigium, vel minimum appareat, neque antiquitas, neque Patrum traditio huculque subodoraverit?

§. IV.

De eadem evasione,

Igitur si nullis conditionibus simpliciter necessariis infallibilitas a Christo Petro donata proditur; quid reliquum est, inquit Auctor eruditus, (a) nisi ut infallibiles etiam dicantur Pontifices, ubi forte, judicium de fide tulerint dormitantes, aut somniantes?

Non

(a) Pag. 49.

Non sequitur illatio ! Absit a viro docto fallacia . Infallibilitas Prophetarum in prænunciandis futuris ; infallibilitas Apostolorum in prædicatione veritatis ; infallibilitas Evangelistarum in scribenda evangelica historia , & infallibilitas Papæ in definiendis rebus fidei , & morum ex Cathedra , habent Deum auctorem ; adeo ut si defectus quispiam erroris , vel mendacii obreperet , idem delinqueret . Decet quippe omnium unum Pastorem omnes oves pascere indefectibili doctrinæ pabulo , uti potissime præstat loquendo ex Cathedra . Porro Theologis compertum est , hujusmodi lumen , sive afflatum , sive specialem Spiritus Sancti adstantiam explicet , esse donum transiens , non permanens , ut de schola loquimur ; quod proinde sapientia , Altissimi dirigente confertur , opportune , pro loco , tempore , & occasione , quibus Deus vult . Ludicra itaque calamo circumponere , nempe an Pontifices dormientes , vel dormitantes infallibilitate absoluta a qualibet conditione gaudere potuerint , nil aliud est , quam Deum auctorem blasphemare , ac irridere . Hoc unum pro irregrabili doctrina habendum est , nimirum si Pon-

si Pontifex ex Cathedra docens erraret, in Deum auctorem error recideret, quod plane impossibile est. Ita de Prophetis, ita de Apostolis, ita de Evangelistis dicendum esset. (a) *Defecerunt scrutantes scrutationes*. Et de his satis.

§. V.

De Magistro Cano.

AD probationes assumpti mox descendit eruditus Auctor (b) contendendo; Pontificiam infallibilitatem tunc tantum haberi, explerique, dum Pontifex præmissa Ecclesiæ Romanæ, Peritorum, Sapientum, ac maxime S.R. E. Cardinalium, nunc Clerum ejusdem Ecclesiæ constituentium, Consultatione, habitoque consensu, in materia morum, & fidei, ex sacro tribunali pronunciat. Quod adeo necessarium simpliciter autumat, ut si absque præfata conditione, vel medio judicium ferat, fallibilitatis periculum Pontifex subire cogatur. Plures Doctores illustrioris notæ in hanc conspirare sententiam recenset,

(a) August. tract. sup. Psal. 61. v. 7.

(b) Pag. 8. Et in iter, defens. art. 2.

set, & primo profert in medium eximium Theologum Melchiorem Canum, (a) de cujus auctoritate in præsentiarum erit sermo.

Unum hæere in mente necesse est, me nunquam inficiari, aut inficiaturum officii, & muneris Romani Pontificis esse, ut omni cura, studio, ac diligentia adhibita, & præhabita de re definienda, iudicium discretivum agitet, & præmittat, ut serio, diligenter, & humana ratione, ac via, de controversia examinata, iudicium finale definitivum prodeat. Sed difficultas suborta in eo sistit, an ad huiusmodi examen cogatur Pontifex necessario Consiliariis uti, & peritorum consultatione, ne incertum, & fallibile iudicium proferat: vel id tantum ad convenientiam salubrius desideretur, adeo ut si Pontifex per sese præster quidquid ad enucleandam difficultatem opus esse perceperit, infallibilis ponderis sententia, ac definitio evadat. Hoc secundum adversus Auctorem eruditum tota contentione virium propugno.

Nunc ad sententiam Magistri Cano deveniam. (b) Proposuerat opinionem ali-

(a) Libr. 5. de loc. Theol. c. 5.

(b) Loc. cit. §. Item.

alicujus dicentis, dubiam, & incertam, fore definitionem Papæ, sive Concilii, nisi constet nobis adhibitam fuisse diligentiam, ut via, & ratione procederet inquisitio. Deinde placitum quorundam recitans, ait: (a) Sunt etiam, qui non obscure dicant, quod si quando Romanus Pontifex, in definitione fidei, erravit, inde evenire potuit, quod non tantam, quantam debebat, adhibuit diligentiam, antequam sententiam proferret: quod vel rem non examinavit, vel non eos, quos oportebat, consuluit. Quibus si objicias, Apostolicam Sedem errare in fide non posse; fatentur id quidem; sed ajunt, Sedis Apostolicæ nomen non solum Summum Pontificem significare, sed ipsum, ut facit ea, quæ ad Cathedram spectant: hoc est, quatenus non ex suo, sed ex consilio bonorum virorum, & doctorum procedit: ita Sedis Apostolicæ judicia intelligi, non quæ occulte, malignose, inconsulte per solum Romanum Episcopum, aut etiam cum paucis sibi faventibus proferuntur; sed quæ ab eo ex consilio plurimorum virorum sapientum, plene prius re examinata, prodeunt.

En opinio aliquorum a Magistro Cano

no

(a) Loc. cit. §. Alter.

no recitata ; neutiquam probata ; ut mox constabit . Eam Silvestri scrupulum vocaverat , dicens : (a) *Alter vero scrupulus ita Silvestri animo resedit , ut vix eum pellere potuerit . Et hunc scrupulum fastidians Cano statim subjicit . Meliusque fuisset oculere , quam stimulare cæteros , quo ipse scrupulo pungebatur . Hæc valde notanda sunt , & conferenda cum iis , quæ infra de placito Silvestri recolenda erunt .*

Cano celeberrimus confestim scrupulum ab inconvenienti disjecit , ac repulit , inquiens : *Quamobrem qui sive Pontificum , seu Conciliorum diligentiam fidei causa finienda in dubium vocant , eos necesse est omnia Pontificum judicia , ac Conciliorum infirmare . Et adeo absurda visa est Cano hæc opinatio , ut infra animadverterit : (b) Ac si semel Hæreticis hanc licentiam permittimus , ut in quæstionem vocent , num Ecclesiæ judices eam diligentiam , & curam exhibuerint , qua opus erat , ut quæstio via , & ratione finiretur : ecquis adeo cæcus est , qui non videat , omnia mox Pontificum , Conciliorumque judicia labefactari ?*

Plu-

(a) Loc. cit. init. cit. §. Alter .

(b) §. Itaque ,

Pluribus male sanam opinionem exagitat, & evertit Cano exclamans: *Quid? Quod si semel de diligentia Judicium dubitamus, novum examen, judiciumque semper recens postulabitur, ut de diligentia adhibita, vel non adhibita censeatur?*

Igitur opinatio; quæ arridet erudito Auctori, displicet Cano, & sapienter eam ut absanam rejicit, ac reprobatur.

Explicat deinde Magister Cano sententiam suam, dicens: *Nos igitur scrupulum illum posteriorem, si cui infixus est, aliter ex animo evellemus. Nam Deus suaviter disponit omnia, simulque prospicit, & finem, & media... Itaque præstat semper Pontifex, quod in se est, præstatque Concilium, cum de fide pronunciant; caditque causa, si quis ex nostris aliter existimat. Quemadmodum enim, si Christus Petro diceret, ego rogavi pro te, ne deficiat caritas tua, certo certius intelligeretur, diligentiam, curam, vigilias, preces, cæteraque auxilia opportuna illi impetrasse, quæ sunt ad caritatis conservationem necessaria; ita cum dixit; ego rogavi pro te, ne deficiat fides tua, proculdubio intelligimus id a Patre suo consequutum, ut quæ ad rectum de fidei*

B

quæ-

quæstione iudicium oporterent, ea adessent Petro omnia, sive a Deo, sive ab homine expectarentur.

His posterioribus verbis tota res conficitur. Nimirum vel a Deo tanta sapientia donata est Pontifici, ut proprio studio, ac labore verum a falso in proposita quæstione discernere valeat; vel tali prudentia erit ex alto præditus, ut peritorum consilium sollicitate satagat. Quamobrem potuit, & optime, Leo Magnus per se ipsum Epistolam dogmaticam adversus hæresim Eutychianam condere, quæ ut infallibilis veritatis oraculum accepta est in Concilio Chalcedonensi. Ergo aliena consultatio peritorum, sive assensus nequit esse de necessitate simpliciter ad ferendum iudicium definitivum in fidei causa.

Laudat quidem Cano necessitatem adhibendi consilium, & expendendi utriusque partis argumenta, tam respectu Pape, quam respectu Concilii, sed necessitatem illam nunquam stricte absolutam, & simpliciter talem agnoscit. Siquidem profert exemplum statim (a) de Concilio Ierosolymitano Apostolorum, ubi inter eosdem Iudices magna conquisitio facta est:

(a) Loc. cit. § .Nam & Apost.

est: item de Concilio Nicæno, ubi Patres nullo de foris consulente per se ipsos Arianam hæresim profligarunt, & Catholicam veritatem constabiliverunt. Quumque sapientibus Judicibus conceditur, etiam per se ipsos tantum, decretorium iudicium disquirere, & dicere; & cur denegabitur hoc idem Leoni Magno, Gregorio Magno, alterique sapientissimo Pontifici, qui fortasse quoslibet peritos scientia excelleret?

Hæc fuit sententia Magistri Cano, quam ipse eruditus (a) Auctor semper coluisse, & complexum esse enunciat. Quumque non prioris opinionis, sed hujus posterioris Cano sit auctor, mirari subit, cur ille in reprobata a Cano opinionem deflectat. Sed utinam vestigiis tanti Magistri inhæsisset, quia certo certius nunquam dixisset, Papam esse fallibilem, si desit Ecclesiæ Romanæ, hoc est Cardinalium S. R. E. consensus; neque usquam infallibilem hanc Ecclesiam Romanam specialem proclamasset; conjudicemque pronunciantem cum Papa definiti dogmatis, contra Canum, strenuum infallibilitatis,

B 2

Pon-

(a) Pag. 44.

Pontificiæ defensore , ac vindicem , unquam protulisset .

§. VI.

De Magistro Silvestro Prierate :

PLura expendenda occurrunt in auctoritate Prieratis , quam objicit eruditus Auctor . Non diffiteor doctorem hunc in eo esse sensu , (a) Pontificem Romanum tunc infallibilitate judicii gaudere , quum agit ut Caput Ecclesiæ , scilicet , quum utitur membris suis procedendo ex peritorum consilio , sive Mitrati sint , sive Galerati , vel neutrius sint conditionis . Laudat tamen , si Papa utatur Cardinalium consilio . Hanc igitur consultationem necessariam esse Silvester censet , quia inquit : (b) *Papa , ut Papa ex officio suo agens false determinare non potest propter assistentiam Trinitatis , & idem de Concilio cum Papa .* Sed an velit hanc necessitatem esse absolutam , incertum , ut hic & alibi ostendam .

Ad-

(a) In Summ. V. Concil. & tract. de irrefrag. ver Rom. Eccl. cap. 15.

(b) Tract. cit. c. 16. § non obstat?



Admitto supremum Principem debere in regimine habere assidentes, & Consiliarios, quibus uti possit nedum in arduis, sed etiam in minoribus negotiis, quia pluribus distractus impar fit ad singula. Pariter admitto de jure Capitis esse, posse uti membris suis, prout justitia postulat, in ordine ad finem, qui est bonum totius corporis; & admitto, quod ubi major est arduitas, & difficultas in judiciis, cæterisque occupationibus, tunc magis, ac magis urget necessitas habendi assidentes, & arcessendi Consiliarios. Hæc omnia contingunt passim in quocunque, recto, & ordinato regimine, & maxime Sedis Apostolicæ, *cujus sententia tanta semper consilii moderatione concipitur, tanta patientia, & maturitate decoquitur, tantaque deliberationis gravitate profertur, ut nec immutari necessarium ducat; nisi forte sic prolata sit, ut retractari possit, vel limitari:* inquit (a) Gregorius Magnus,

Potiori necessitatis vi id incumbit Principi, qui ad veritatem intelligendam minus fuerit idoneus; & fortius, si de re fidei, quæ non est, neque esse potest re-

B 3

tra

(a) Can. Apostolicæ 35. quæst. 9.

tractabilis , & mutabilis , supremum Judicem controversiarum agere sit opus .

In predictis Silvestro acquiesco . Sed quod ulterius cogatur supremus Judex sub poena incertitudinis , vel nullitatis judicii , in quocumque actu assidentes adhibere , & aliorum consilium exquirere , etiamsi sit Judex sapientior , & excellens , diligens in labore , & studio paratus , ac promptus ad difficilia dirimenda , & accommodatissimus , ut re , quam capeffit , optime perfungatur ; neque probat , neque intendit eruditissimus Silvester . Verbo . Nunquam Silvester dixit Papam non esse infallibilem , nisi utatur consulentium ope , neque hanc conditionem esse necessariam simpliciter pro infallibilitate ejus judicii , unquam probavit , aut confecit . Nunquam de Pontifice undequaque doctissimo , nunquam de Pontifice præstantissimi ingenii , qui quoslibet Consiliarios docere possit , nunquam de Magno Leone , nunquam de Magno Gregorio , nunquam de alio , de quo dici possit : *Ecce plusquam Salomon hic* , est unquam loquutus , vel quæstionem instituit ; certius in oppositam abiturus sententiam , si id excitasset .

Ita

Ita res rebus junctæ facile committuntur . Nimirum & quod in potestate Capitis sit uti membris totius corporis ; & quod sit ei liberum illis uti , ubi maxime agitur de judicio , quod proprium est opus mentis capiti insidentis . Hæc potest esse excellentior præ cæteris dono consilii ex alto prædita , quin coacta sit ex necessitate absoluta aliorum consultationem expostulare . Concedo id infrequentius contingere , sed mihi fatis est exemplo Sancti Leonis insistere , proprio labore , ac studio scribentis Epistolam dogmaticam infallibilis veritatis contra Eutychem , ut expuncta abunde agnoscaturnecessitas absoluta , & simpliciter alienæ consultationis ; adeo ut aliter definientem Pontificem cogamur dicere fallibilitatis vitio laborare , vel laborasse ; quod summum piaculum foret vel de Magno Leone suspicari .

Consentiunt quoque Canones a doctissimo Silvestro producti , quibus se totum dedit , nempe Can. *Apostolicæ* , jam supra relatus , & cap. *Venerabilem* ex Innocentio III. , ubi (a) Deuteronomii verbis relatis , statuitur lege veteri a Deo

B

4

de-

(a) Deut. cap. 17.

decretum fuisse obsequendi sub poena capitis iudicio Sacerdotum Levitici generis in emergentibus causis, *inter sanguinem, & sanguinem, causam, & causam, lepram, & lepram.* (Ecce assidentes, en Consiliarii, Innocentio teste) deinde subdit textus: *Qui autem superbierit nolens obedire Sacerdotis imperio, qui eo tempore ministrat Domino Deo tuo, & decreto Iudicis, morietur homo ille.* Verba hæc nihil cogunt pro sententia, quam impugnamus. Possunt adesse assidentes, & Consiliarii, & multi Iudices, quibus piaculum sit refragari: sed etiam adest supremum Summi Pontificis imperium absolutum ab aliena consultatione, cui nefas sit obistere. Aliter superfluum fuisset distincte loqui, & de iudicio Sacerdotum Levitici generis, & de iudicio summi Sacerdotis pro tempore ministrantis Deo in arcano Sanctuarii,

Confirmat omnino sententiam motum dubium ab eodem Silvestro, (a) nempe dissidentibus Patribus unius Concilii, cui debeat Pontifex pro suo officio assentire? docetque neutri standum, sed accersitis aliis Consiliariis, cum istis litem esse diri-

ri-

(a) Tract. cit. cap. 16, ad 4. punctum.

rimendam : quia tunc ex alto lumen pro veritate certissime aderit . In casu tres consultationes fortasse oppositæ de re valde difficili occurrere possunt , & æque pugnare in mentē Pontificis . Tunc alteri adhærens , nonne ex proprio infallibilitatis privilegio certissimum profert oraculum ? Nonne per se se veritate comperta ex promissa Spiritus Sancti adfistentia , contingere poterit , expetitam consultationem , despiciere , & secundum alterius partis Patrum Concilii , etsi fuerit unius tantum contradicentis , iudicium decretorium ferre ? Nonne sermo his principiis instructus , momentisque vallatus aptius , & iustius evangelicis congruit verbis : *Pasce oves meas : confirma fratres tuos* ; unde origo infallibilitatis in Petrum fuit quam cæteris interpretationibus , ex ingenii dumtaxat acumine , effossis , & firmiori traditione destitutis ?

Si autem hæc doctrina a scopo Magistri Silvestri deflectat , libentissime & ipse a Silvestro deflecto ; cavens quam maxime , ne censura sapientissimi (a) Cano , alias relata , de eadem concertatione loquen-

(a) Libr. 5. de log. Theol. cap. 5. §. Alius.

quentis me perstringat . Verba sunt : *Alter vero scrupulus ita Silvestri animo resedit , ut vix eum pellerere potuerit . Meliusque fuisset occulere , quam stimulare cæteros , quo ipse scrupulo pungebatur .*

Quo ad factum Anastasii Papæ Acatio communicantis erravit Silvester , neutiquam Anastasius , ut egregie evincit Cardinalis a Turrecremata . (a) Qui hallucinatur in probationum momentis , plane in themate hallucinatur , & male instructam causam ob defectum rationum propinat ; ut infra latius patebit .

§. VII.

De Cardinali a Turrecremata .

Amplissimum Cardinalem de Turrecremata auctorem integrum , & cœvum schismatis Basileensis , in suæ opinionis præsidium adsciscit (b) eruditus Auctor . Auctoritas , sive argumentum procedit ex tract. de potestate Papæ , (c) ubi inquit , quid nomine Judicii infallibilis Sedis Apostolicæ intelligendum sit . Censet proin-

(a) Cap. 92. ad 8. obicit .

(b) Pag. 19. in iter. def. pag. 38. (c) Cap. 112. ad 6.

proinde sententiam in iudicio a Romano Pontifice prolatam eam esse; *Quæ maturo, & gravi virorum Sapientum, & maxime DD. Cardinalium consilio primo digesta, & maturata sancitur, & profertur...* Quibus omnibus consideratis, concludit *sine dubio tenendum est hoc, quod de Apostolicæ Sedis iudicio dictum est; videlicet, quod in his, quæ fidei sunt, deficere non possit.* Prius dixerat. *Non eam sententiam esse, quæ occulte, malitiose, aut inconsulte per solum Romanum Pontificem, aut etiam, quæ per ipsum cum paucis sibi faventibus, aliis in fraudem non vocatis, ad partem profertur, Hæc summa objectæ auctoritatis.*

Verum exulat prorsus ab hac sententia necessitas illa simpliciter talis alienæ consultationis ab erudito viro injecta. Nihil enim inducit Cardinalis de Turrecremata de possibili eventurum in casu, quo Papa pari, ut opus est, sapientia, ac prudentia præditus, proprio labore, ac diligentia utens absque aliorum peritorum consilio decerneret. Quod mox evincam. Item eximius Cardinalis; agens de Conciliis sermonem instituit: (a) *De iis, a*
qui-

(a) Traët. de Concil. cap. 27.

quibus cavendum est in Conciliis. Decem enumerat inconvenientia prorsus indigna maturitate Conciliorum, in quibus potiora a Pontifice eliminanda recensentur, quin infallibilitatem universalis Concilii vulnerare prætendat. Item inquit: (a) *Qui admittendi sint ad Concilium universale, & qui non?* Præcedenti cap. (b) laudaverat consiliarios Doctores in divinis & canonicis decretis vocare, & adhibere, sed nullatenus id esse simpliciter necessarium dixit, & exemplis comprobavit. Hinc validum argumentum conflatur. Si plenario Concilio, Judicibusque in eo sedentibus non est necessarium simpliciter de foris consultationes exquirere ad judicium ferendum, quum ipsi per se se valeant, & controversias expendere, & finaliter decidere, esto sæpe id congruum, & convenientissimum visum fuerit, consiliarios scilicet admittere, ut in Tridentino, aliisque præcedentibus Conciliis actum est; cur necessitatis hujus vinculum fas erit injicere summo omnium Capiti Romano Pontifici; a quo ipsa Concilia aucto-

ri-

(a) Cap. 15.

(b) Cap. 14.

ritatem , & robur expectant , adeout ad has incitas sententiam Cardinalis conspicui coarctare necesse fuerit ?

Id vehementius contendo ; quoniam ipsemet spectabilis a Turrecremata necessitatem simpliciter cogendi Concilium rejiciens , libertatem Pontifici relinquit illud convocandi , prout ratio , & temporum circumstantiæ urgere possunt : Et tamen ab initio exemplum Petri nos docet , Concilium Jerosolymis habitum esse ad dirimendam obortam controversiam circa legalium observantiam . Ubi autem Concilii necessitatem abjicit , præeunte exemplo adeo splendido , nunc credendus est acerrimus propugnator necessitatis simpliciter utendi consiliariis , qui inter Rectores Ecclesiæ ab Apostolo non numerantur ? Illud medium (a) cogendi Concilium , utile quidem , sed non esse necessarium simpliciter asserit , hoc autem medium utendi consulentium ope , & suffragio adeo necessarium omnino reputabit vir Purpuratus in Romano Pontifice , ut si escludatur , Pontificiam infallibilitatem periclitari censuerit ?

Ad

(a) Cap. 9. & 10.

Ad hæc . Quærit (a) Cardinalis laudatus , a quo immediate auctoritas Conciliorum proficiscatur , ac pendeat : decernitque eorum auctoritatem a Pontifice Romano proxime descendere . Quare ? Quia solus Papa est Caput totius Ecclesiæ , cui jure competit membra regere , sensumque omnem , & motum ei præbere , ac influere ; & quia est solus Pastor totius Ecclesiæ , ad quem spectat *providere , & dare pabulum toti Ecclesiæ , quod fit in universalibus Conciliis disponendo , ordinando , constituendo , corrigendo , diffiniendo , interpretando* . Verbo . En medium , unde in Ecclesiam derivat sollicitudo Pastoralis , & Capitis providentia . . Attamen , teste de Turrecremata , hoc medium non est simpliciter necessarium ad excelsi capitis veritatem in Papa , esto (quod plus est) membra ad Concilium vocata potiori jure , quam quilibet Consiliarius simplex , Pontifici adhæreat . Igitur si integrum Concilium non arctat , neque cogit Papam , ut Concilio utatur ; quomodo Purpurato auctori tribuendum erit , concessisse consulentibus , ac peritis absolutam necessitatem ,

tem, ac jus quasi quæsitum, ut sine illis nihil validum, & certum definire Pontifex possit?

Iterum cum Magistro Cano, nec refragante Cardinali de Turrecremata, ad-versantes redarguam dicendo: dat, & dabit Deus Pontifici, & finem, & media sive a Deo, sive ab homine descendant, quin absolute necesse sit, ea unice ab homine expiscari, vel per consilium expectare. Sit congruum, sit conveniens, sanctum, & sanum illud petere, sed abeat longe necessitas absoluta illud petendi, aut illo utendi, ne lata porta refractariis aperiatur, disceptandi scilicet de adhibita, vel non adhibita diligentia, ut superius ex Cano monuimus.

Itaque *directive*, hoc est ad melius esse, loquutus est illustris Cardinalis pro casibus frequentius occurrentibus, ne utiquam cogendo ex necessitate Pontificem sub pœna, ne privilegio infallibilitatis exutus definitionem fidei pronunciet. Patet insuper, quia doctissimus Purpuratus non aliud argumentum profert, quam Cap. *Apostolicæ Sedis* jam superius descriptum, in quo nec verbum quidem conjicere est,
pro

pro necessitate absoluta alienæ consultationis. Sed de his infra.

§. VIII.

De Rodulpho Cupers :

PLacet Auctori erudito prodere Rodulphum Cupers, (a) veluti suæ opinionationis strenuum propugnatorem; quod an verum sit, hic erit discutiendum. Adlaborat Cupers probare: (b) *Juris esse divini, quod Cardinales assistant Papæ ope, & consilio: ideoque Ecclesiam habere Senatum ad majores causas judicandas, ex divina institutione; eumque Senatum esse partem ipsius Ecclesiæ, vel potius Ecclesiam ipsam esse repræsentatam in Cardinalibus.* Quibus jactis infert Cupersius, seu probare intendit: *Pro constanti esse sentiendum, oportere Papam consilia Cardinalium requirere: stante maxime, quod claves Petro commissæ duæ fuerint, una scilicet potestatis, alia discretionis.*

Hæc Cupersius; sed nihil ad causam eruditi Auctoris, a quo enixe peto, ut
ocu-

(a) Pag. 28. §. V. & in iter. def. pag. 56.

(b) In Comment. ad c. oportebat. 79. dist. tract. de SS. Univ. Eccl. art. 2.

oculum referat ad capitula initio tractatus explicata, ubi conjiciet aliter Cuperfium intendere, atque docere, ac sibi fingit vir eruditus. Protinus me expediam lequenti Commentario ad verba Cuperfii.

In præludiis ad citatum tractatum explicat, (a) quid intellexerit docendo, Ecclesiam *jure divino* habere Senatum, aitque, Concilia *de jure divino* esse instituta, & Cardinales itidem eodem Jure constitutos fuisse; quatenus scilicet id potest dici Juris divini, quod *figuratum* reperitur in lege veteri, & *exemplatum* in novæ legis Ecclesia: ex quo latissime Jus divinum Cuperfius interpretatur. Cumque viderit Moyfi assidentes Judices, & Seniores a Deo destinatos, ita Senatum, vel Concilii, vel Cardinalium jure quoque divino, latius accepto, vel potius ad instar divinæ institutionis in data lege Moyfi, perfectum existimat.

Munus Cardinalium esse assidere, & juvare Pontificem ope & consilio, nemo inficiatur.

Oportere Papam consilia Cardinalium requirere, bene est, bonum, expediens

C

est,

(a) Argument. §. alio.

est, sed verbum *oportere* solum, vel nunquam, vel raro necessitatem simpliciter significat; neque in casu præsentis eam significare poterat, quum incertum sit, quo sæculo Cardinalium nomen, & opus in-
vectum fuerit.

Itaque quemadmodum non obstante institutione divina Concilii, vult Cuperius, liberum esse, & semper fuisse Pontifici, illud cogere, & illius ope, & consilio uti; ita liberum relinquit eidem, uti ope, & consilio Cardinalium. Nec quidquam a Cupersio ulterius quispiam emunget. Nunquam enim comminatur Papæ aliter agentis infallibilitatis jacturam. Etiam. Sentit (a) laudatus Auctor, posse Papam in casu dissidii inter Patres integri Concilii neutri suffragari, sed vel aliam inire sententiam, vel suspendere judicium, donec in suam traxerit partes dissidentes sententiam. Hæc nedum gestiunt superiorem Papæ auctoritatem Concilio, sed absolutam quoque a judicio, vel consilio, universalis Synodi. Ecquis deinde fecerit Cuperium sibi contrarium, ut deinde velit Papæ auctoritatem illigatam suffragio inferiorum consulentium? Di-

(a) Art. 2. post. præiud.

Dignum est etiam animadversione ,
 Cuperium velle , conarique probare adesse
 Jure divino Senatum , quem stabile viro-
 rum sapientum selectum Collegium nomi-
 nat . Silvester vero hunc Senatum perma-
 nentem pro necessaria Consultatione non
 requirit ; contentus , ut quibuscumque peri-
 tis libere Papa uti possit . Ergo vel unus ,
 vel alter , vel uterque fallitur . Ubi est enim
 probabilitas opinionis , quæ iter prætentat
 absque constante principio ? Quocirca ne-
 cesse est ambos interpretari loquutos citra
 necessitatem simpliciter , & absolute talem ,
 & de Jure divino exemplato , quod nihil
 cogit .

§. IX.

De Joanne Driedo .

PROducit in medium eruditus (a) Au-
 ctor Joannem Driedo , tamquam as-
 sertorem absolutæ necessitatis , qua Papam
 vult adstringi ad præviam consultationem
 habendam cum peritis ante fidei defini-
 tionem : quia scripserat : (b) *Unde & sen-*

C 2

ten-

(a) Pag. 27. §. IV. & in iter. def. pag. 51.

(b) De libert. Christi. l. 2. c. 2.

tentia Papæ circa fidem tanta consilii moderatione concipi debet, tantaque maturitate patientiæ decoqui, & tanta deliberationis gravitate proferri, ut omnino recta sit credenda. Hæc abunde in præcedentibus explicata sunt, & maxime §. VI. Pergit Driedo. Verum quia Papa quatenus homo talem modum deliberationis, circa ea, quæ sunt fidei, potest omittere, & inniti proprio sensui, propriæque prudentiæ, idcirco etiam plerumque liceret examinare literas mandatorum Papæ desinientis aliquid credendum esse, aut fide tenendum. Hactenus Driedo obiter rem attingens.

Sermo æquivocatione plenus est. Si enim, ut homo mendax potis est diligentiam necessariam præterire, tunc neque potis est rem de fide definire; quia tunc agit, ut homo privatus, cui non est collata infallibilitas iudicii. Sed quando intelligitur, ut homo Papa ex officio desinens, tunc implicat posse definire, ut est homo mendax, non præhabita vel per se, vel per alios, ea diligentia, quæ satis sit ad veritatem intelligendam. Primum videtur Driedo respuere, quum passim doceat, esse Pontifici obediendum, utpote
om-

omnium Pastori a Christo dato : Igitur secundum amplectitur : nimirum, ut *proprio sensui, propriæque prudentiæ* non innitatur ; sed studio Sacræ Scripturæ, traditionique Ecclesiæ, quod præstitit per se M. Leo, nec præstare poterat excellentius.

Hinc duo absurdissima sequuntur. Vel liberum facit plebi, & ovibus post latam definitionem dubitare de adhibita, aut non adhibita diligentia, (quod etiam respectu Concilii plenarii evenire potest) & tunc sive pronunciet ut Papa, sive ut homo ; semper incerta erit fides. Vel liberum adhuc relinquit plebi examen, & iudicium super re definita ; & tunc jus erit cujuscumque credere, vel non credere, donec sibi constet de veritate, aut falsitate, judicii. Utrumque amplexus est Lutherus ad maledicendum Tridentino Concilio, & utrumque abhorruit Driedo exprobrans Lutheri vafritiem.

Ut autem errorem adeo supinum, avertam ab eximio doctore, respondere oportet, nil aliud permittere, quam examen de falsitate, aut de veritate, editi diplomatis, neutiquam rei definitionis. Quamobrem expresse dixit : *Ple-*

rumque liceret examinare literas mandatorum Papæ!

Cæterum ad rem nostram nihil agit Driedo; an Papa possit per se se omnes illas diligentias explere, quas labore consulentium peritorum comparare valeret, de quo est præsens discussio. Quo admisso nequit Driedo adimere judicanti Pontifici debitum infallibilitatis privilegium.

§. X.

De Stanislao Cardinali Hosio.

STanislai Cardinalis Hosii testimonium. Arridet (a) erudito Auctori. Scripsit ille; (b) *Beati Doctores, si non iisdem verbis, iisdem tamen sententiis, multis in locis, concorditer adstruxerunt, hæreticum esse omnem hominem, qui a Romana, & Universali Ecclesia in fidei doctrina discordat. Sic ante 400. & amplius annos hæreticum pronuntiavit, quicumque diversum ab Ecclesia Romana docuisset. In qua quidquid gravioribus de causis, fidei præsertim decernitur, non est existimandum, quod solus sit Julius*

(a) Pag. 29. §. 6. & in iter. def. pag. 59.

(b) In Confess. Cathol. fid. c. 28.

*lius V. G. , aut Pius , qui decernat , ut errare
tamquam homo possit . Habet ille , sicut Cypria-
nus loquitur , florentissimum Clerum secum una
præsidentem , singulari doctrina præstantem , de
cujus consilio , siquid gravioribus de rebus , præ-
sertim de fidei causis decernit , labi , & errare
non possit .*

Quid inde extundat vir eruditus ,
nempe ut Pontificem cum Clero suo , vel
cum Cardinalibus illum repræsentantibus ,
necesse sit judicare , si infallibiliter judi-
care voluerit , non video . Etenim olim
judicabat Papa cum Synodis , & in urbe ,
& extra . Judicavit in Synodis generalibus
absquæ consilio Cleri Romani . Igitur Pur-
puratus vir non potuit Pontificiam indefi-
cientiam unice referre ad consilium Cleri .
Ratio , cur nomina Julii , & Pii expresse-
rit , ea est , quia Augustanam Confessionem
confutandam suscepit per Confessionem
Catholicam ibi adornatam . Illa impete-
bat Pontifices , qui operam impenderant
ad promovendum , & absolvendum Tri-
dentinum Concilium . Ista arrogantiam hæ-
reticorum frangebat . Satis fuit Hosio non-
nullos Pontifices illius temporis recense-
re , & morem tunc prævalentem in judi-

cio ferendo innuere . Sed an semper , & ubique hic mos invaluerit , & necesse sit simpliciter observare , neque dixit , neque somniavit illustris Hofius , & extra rem erat inquirere . Nihil ergo evincit eruditus Auctor ex allato testimonio .

Amplius . Si quis hoc idem diceret de quolibet Monarcha , vel de eodem Papa in ordine ad Regimen Temporale , vel Spirituale subditorum , nonne egregie laudaret providentiam Principis , & Pontificis feligentium viros sapientes consulentes opportune leges , & decreta sancienda , unde ora obtreptantium obstrui possent , dicendo , esse cuncta ex prudentum consilio enucleata , & emanata ? Ecquis nisi audax hinc dixerit probari necessitatem absolutam utendi consultatione prudentum , itaut inanes leges sint , si illis inconsultis latæ fuerint ? Igitur ad revincendos Hæreticos sermo Hofii procedit , neque intentum adversarii vel in apice infert ,

§. XI.

De Alphonso de Castro :

PROVOCAT eruditus (a) Auctor ad auctoritatem Alphonsi de Castro, quem nimis fidenter appellat Apostolicæ Sedis indeficientiæ defensores, & vindicem. Hic auctor male audit apud veros propugnatores Pontificiæ auctoritatis, quia teste Bellarmino, (b) sentit Pontificem, etiam ut Pontificem, posse esse Hæresicum, & docere hæresim, si absque generali Concilio definiat, & de facto aliquando accidisse. Hæc Bellarminus, qui hanc opinionem, ut erroneam, & hæresi proximam rejicit, atque sugillat, Et sane Alphonsus tradit : (c) *Ad solam Ecclesiam pertinere Sacrarum Scripturarum interpretationem, quam quisque fidelis amplecti tenetur : Ait : Omnis homo errare potest in fide, etiamsi Papa sit, Nam de Liberio Papa constat fuisse Arianum, & Anastasium Papam fuisse Nestorianum Non enim credo aliquem esse adeo imprudens-*

(a) Pag. 31. & in iter. def. pag. 63.

(b) Lib. 4. de Rom. Pont. c. 2. §. secunda op. n.

(c) Lib. 1. c. 4. advers. hæres.

dentem Papæ assentatorem, ut ei tribuere hoc velit, ut nec errare, aut in interpretatione sacrarum literarum ballucinari possit... Si ergo in interpretatione sacrarum literarum quilibet homo errare potest, erit necessario iudicium interpretationis penes totam Ecclesiam, penes quam jus fuerat discernendi Sacras Scripturas ab humanis. Nam hæc errare non potest, quum a Spiritu Sancto sit edocta.

Miror Alphonsum tribuere Ecclesiæ, neutiquam Papæ immunitatem ab errore, quia hic homo est, perinde ac Ecclesia ex hominibus conflata non fuerit; vel æque ac ista nequeat edoceri a Spiritu Sancto.

Hæc forte delectant adversarium Auctorem, quia communi crimini blandiuntur. Pergamus ad cætera. Prosequitur Alphonsus de Castro Pontificem insectari; deinde, veluti ex indulgentia, asserit: (a) *Ad solam Sedem Apostolicam, aut generale Concilium spectat de hæresi censere*, Et post probatam auctoritatem Concilii, quia totam repræsentat Ecclesiam, subdit: *Sedes autem Apostolica, quoniam Ecclesiam*
tam-

(a) Loc. cit. cap. 8.

tamquam Caput repræsentat , primum post generalia Concilia in definiendo tenet locum . En Caput post membra , en ovile prius Pastore ?

Nunc ad verba objectionis . *Verum hic animadvertendum est , nomen Sedis Apostolicæ non pro solo summo Pontifice accipi , quum hic in fide errare possit , ut superius de Liberio , & Anastasio ostendimus . Sed Sedes Apostolica , quæ nunquam erravit , comprehendit tam Collegium Cardinalium , cujus Concilio juvatur Pontifex , quam ipsum Pontificem . De qua Sede non constat aliquando errasse . An autem Collegium Cardinalium errare possit , non differo . Credo tamen , quod Dominus nunquam permittet totum Collegium hæresi maculari . Quapropter justum est , ut in re tanti momenti , qualis est Fides Catholica , consulat fratrum suorum Collegium , antequam quidquam definiat , adjunctis etiam , si possibile foret , viris aliis sanctitate perinde ac doctrina eminentibus . Advertere debuerat eruditus Auctor , dixisse Alphonsum de Castro , justum est , non autem dixit , esse id necessarium , ut contenditur . Primum utroque pollice probamus , secundum rejicimus .*

Cæ-

Cæterum, sane mirandum; Alphonsum de Castro, alioquin perdoctum virum, & de Pontificia dignitate adeo egregie, ac magnifice differentem, mox Pontificiam judicariam potestatem acerrime, deijcere, itaut penè abroget. Infra loquens (a) de prærogativis a Christo datis Petro, defendit, institutum fuisse Caput & Pastorem totius Ecclesiæ, eumque præ cæteris Apostolis, & supra Apostolorum chororum honoribus, honorumque præmiis ornatum fuisse, quos singulatim dinumerat, Hic eandem dignitatem una cum Pontifice, polluit, ac dissipat. Exuit illum potestate interpretandi Scripturas, discernendique, veras a falsis. In hæresi detegenda & diradicanda post Concilium tantum Judicem Papam constituit. Deinde hoc idem Papæ iudicium illigat Collegio Cardinalium; aitque credere, Deum nunquam permissurum irrepere errorem in hoc Collegium, Papam vero, quia homo est, errori obnoxium esse; infamatque arroganter, ac invidiose Liberium, ut Arianum, & Anastasium, ut Nestorianum criminatur. Sed, quod audacius est, non erubescit

(a) L. 12, advers. hæres.

scit promittere, & fidei ubere pro Cardinalium infallibilitate; at pro Romano Pontifice negat quidquam indulturum. Imo quum recenseat, plurima adesse Sanctorum Patrum testimonia asserentia Apostolicam Sedem nunquam a fide deviasse, in Decreto (a) inserta, ea ad quisquilias Gratiani amandat, quatenus ad Papam trahantur, inquiens: (b) *Videat, qui volet.*

Heu infelix Petrus, qui nihil obtinuit a Christo præter verba! His auctoribus gratulatur Auctor, & festive se adjungit; sed absque Scripturæ Sacræ textu, ac Patrum testimoniis nihil proficit; neque alius osor, etsi colligatis caudis mutuo complexu sese jungant, quidquam efficiet in perniciem Pontificiæ infallibilitatis.

§. XII.

De Cardinali Bellarmino.

QUum inciderit sermo de amplissimo Cardinali Bellarmino, sequar eruditum (c) Auctorem, qui eum sibi

(a) 29. q. 1.

(b) Cit. cap. 8.

(c) Pag. 12. not. 3. & in iter. def. pag. 23. in fin.

fibi adjudicat, quia docuerat, juxta certissimam sententiam dicentem: (a) Pontificem non posse ullo modo definire aliquid hæreticum a tota Ecclesia credendum, aliquos sentire: Pontificem non posse errare, si mature procedat, & consilium audiat aliorum Pastorum. & alios, inquit, dicere, Pontificem etiam solum nullo modo errare posse. Explicat deinde eximius Cardinalis utramque opinionem, & conciliare studet, dicendo: Posteriores auctores non negare, quin teneatur Pontifex mature procedere, & consulere viros doctos, sed solum dicere volunt, infallibilitatem non esse in cætu Consiliarium, vel in Concilio Episcoporum, sed in solo Pontifice: sicut è contrario priores non volunt ponere infallibilitatem in Consiliariis, sed in solo Pontifice: verum explicare volunt Pontificem debere facere, quod in se est, consulendo viros doctos, & peritos rei, de qua agitur.

Mox subdit: Si quis autem peteret, an Pontifex erraret, si temere definiret? Sine dubio prædicti auctores omnes responderent, non posse fieri, ut Pontifex temere definiat; qui enim promisit finem, sine dubio promissit,

(a) Libr. 4. de Rom. Pont. c. 2.

fit, & media ... Parum autem prodesset scire, Pontificem non erraturum, quando non temere definit, nisi etiam sciremus non permissuram Dei providentiam, ut ille temere definiat.

Hucusque Bellarminus; qui nos docet, esse præcise loquutum juxta varias doctorum opiniones, quas ibi recitat, nihil de propria sententia statuens, an alteri adhæreat. Satagit quidem eas non dissidentes inter se ostendere, sed a judicio veritatis alterutrius abstinet. Quapropter incertum est, cui patrocinetur. Et si conjectare licet, quum ejus conciliatio per doctrinam Magistri Cano expressa sit, verius dici potest cum Cano sentire. Frustra igitur jactat eruditus vir pro se Bellarminum habere.

Amplius. Ex toto Bellarmini contextu non eruitur questio, de qua agitur, quum penitus illam omittat: nempe ne Pontifex mature procedens, & faciens, quod in se est, ut veritatem intelligat, quam proprio studio, & labore aptus est percipere, & discernere, adhuc coactus sit, ne erret, consulentes adire? Nec verbum quidem facit de hac re Bellarminus; ergo perperam ad causam trahitur. Imo quum
in-

infallibilitatem in solo Papa residere sentiat, prorsus censendus est, necessitatem absolutam alienæ consultationis repellere. Idcirco censuit absolute Bellarminus, teneri Papam facere, quod in se est, etiam consulendo peritos, si opus fuerit; & sic curat conciliare pugnantes opiniones, dummodo constans sit apud illos sententia, quod Papa solus sit infallibilis, cui certe Auctor refragatur, ut a Bellarmino dissentiat.

§. XIII.

De Cardinali Albitio :

Objicit eruditus Auctor sententiam Francisci (a) Cardinalis Albitii per hæc verba : *Diligens controversiæ definiendæ examen, debitamque peritorum consultationem, media esse necessaria ad infallibile judicium proferendum, quæ nisi Pontifex adhiberet, inconsiderate, ac temere ad res de fide definiendas accederet.*

Sed fallitur vir eruditus. Neque verba allata, neque sensus sunt (b) Cardinalis Albitii. En verba ejus : *Neque oportet*

(a) Pag. 13. & in iter. def. pag. 24. De inconst. in fid. cap. 3.

(b) De inconst. in fid. c. 3. num. 24. & 25.

oportet esse sollicitum ; an Summus Pontifex debitam diligentiam adhibuerit , & contulerit rem cum peritis : quia eo ipso , quod Deus permittit doctrinam proponi cum auctoritate , supponendum est , jam rite esse discussam a proponente ; maxime enim spectat ad divinam providentiam , & ad assistentiam Spiritus Sancti , quam habet super regimine suæ Ecclesiæ , ut non permittat omitti examina , & diligentias debitas , & procedi inconsiderate , ac temere ad res definiendas , vel ad præcipiendas , aut prohibendas toti Ecclesiæ . Nar-
rat deinde Albitius quantum laboris , & studii impensum fuerit in examine quinque propositionum ex libro Jansenii excerptarum , de quo nihil ad nos .

Itaque plurimum distant germana verba Albitii ab illis invec̃tis a viro erudito . Et constat ea a nobis integre allegata adamussim convenire cum doctrina Magistri Cano , de qua in superioribus actum est . Quamobrem tantum abest , ut necessitas simpliciter peritorum consilii pro infallibili judicio Papæ concludatur , quin potius apertissime expuncta appareat . Docet enim *supponendum jam rite esse discussum a proponente .* Rite quidem , vel re-

D

ner

per se se examinata a Pontifice apto ad discretorium iudicium, vel cum peritis collata; ideoque de uno, vel altero modo non oportere esse sollicitum, monet. Quod caveret utique, si alter foret simpliciter necessarius ad certitudinem iudicii comparandam.

Pudet hic referre animadversionem, quam Auctor asseruit in postremo cit. opusculo: ubi de Papa plane rudi rerum Theologicarum ponit exemplum, ut evincat necessitatem alienæ consultationis. Quid hæc ad rem nostram? Sufficit mihi Magnus Leo. Sufficit Duvalio Innocentius III. Sufficit omnibus una exceptio ad eliminandam male partam necessitatem absolutam; ut Philosophia nos docet.

§. XIV.

De Joanne Viguerio:

IN dicta Joannis Viguerii inquirens eruditus (a) Auctor verba profert sibi pergrata. Hæc sunt: (b) *Dicendum, quod Summus Pontifex, ut persona privata errare*
po-

(a) Pag. 10. & in iter. def. pag. 20.

(b) Cap. 10. in instit. Theol. de virt. fid. vers. 13.

potest, non tamen, ut est Summus Pontifex... Papa autem operatur, & pronunciat, ut Summus Pontifex, sive ut Papa, quando observat ritum in Conciliis Apostolorum, & Sanctorum Patrum definitionibus observari solitum: ut puta quando vocat Concilium seniorum, hoc est Episcoporum, & instat, instareque facit orationibus, & invocat Spiritum Sanctum, cujus assistentia Ecclesiae promissa est: imo ipsemet talibus congregationibus adfuturum se pollicitus est, & non patietur ipsum errare.

Procul dubio Viguerius longe abest a præsenti quæstione. Etenim negat Pontifici infallibilitatem judicii extra Concilium; quod sane cadere non poterat in ejus mentem, quam non latebat pluries Pontifices extra Concilia, per Decreta, & Constitutiones de fide Ecclesiam docuisse, & docere. Idcirco ibi tantum de editione Symboli agens ad totam Ecclesiam spectare censuit juxta placitum Alphonsi de Castro. Quum autem vers. 15. sequenti sermonem habuit de Canonizatione Sanctorum, præclare, ut par est, docuit de Pontificia infallibilitate, dicens, ad Papam illam spectare, quo ad manda-

tum venerationis per totam Ecclesiam, tanquam quamdam fidei protestationem, quia *ad illum solum pertinet, ad quem spectat quæstionem fidei terminare*. Et sibi obiciens periculum errandi, respondit id quidem contingere, si Papa agat, ut privata persona; *sed procedendo ut Summus Pontifex, scilicet cum facit, quod in se est, & secundum ritum, & consuetudinem Ecclesiæ, & Sanctorum Patrum, errare, aut decipi non potest*. Tunc enim comparatur ad divinam providentiam, quæ Ecclesiam suam Spiritu Sancto dirigit, ut non erret.

Quid luculentius ex Viguerio in adversantem opinationem? Quando Pontifex facit, quod in se est ad veritatem assequendam, vel per vires altæ suæ mentis, ut ferebat Leonis Magni doctrina, vel per peritorum consilium, ad divinam providentiam promissa præstantem pertinet, ne desit Spiritus Sancti assistentia, quum occurrit definitioni fidei incumbere.

Auctor nos remittit ad Synodos populares tempore Apostolorum per Petrum coactas. Sed nihil penitus eruitur ad propositum Viguerii. Hic petit expresse

Se-

Seniorum, hoc est *Episcoporum* convocacionem, juxta ritum ab Apostolis inchoatum, & a SS. Patribus traditum. Popularia Concilia Jerosolymis facta admittebant quoque feminas, ut probat Silvester cap. XI. Sed de his non loquitur Viguerius. Loquitur quippe de tertio Concilio, ubi Apostoli & seniores convenerant. Mox transferens seniores in Episcopos vult Papam teneri, nedum ad servandum ritum dicti Concilii, sed etiam ad sequendam personarum electionem. Quo admissa actum est de infallibilitate Papæ extra Concilium, *Et ecce error pejor priore*.

§. XV.

De Andrea Duvalio.

A Lacri animo complector (a) Andrea Duvalii auctoritatem objectam ab erudito adversario, quia aliter, ac ipse sentit, ut ex integro textu constabit. Arguebat Richerius adversus Papæ infallibilitatem: (b) *Unj alicui a Deo, aut a natura datum non esse, ut solus sapiat*, Respondit

D 3

Duva-

(a) Pag. 52. §. 38.

(b) De infallib. Summ. Pont. p. 2. q. 3.

Duvalius : *Summum Pontificem non ita sapere , ut se solo absque ulla perquisitione , & consultatione aliquid possit definire ; atque adeo si ita definivisse constaret , dummodo res judicaretur admodum ardua , & de qua viri doctissimi ultro citroque dubitarent , non censeretur hac in parte se gessisse , ut Pontifex : debet itaque in suis definitionibus perquisitione cum viris peritis semper uti . Non enim , ut eleganter docet Vincentius Lirinensis libro contra hæreses , nova fidei dogmata statuit Ecclesia , sed vetera eruit . Eruiere autem est rem è suis principiis indagare , & perquirere : quod maxime fit , peritos adhibendo in consilium , qui rem definiendam mature considerent , idque regulis a Christo Ecclesiæ relictis , Scriptura , Traditionibus , Decretis prædecessorum suorum , unanimi Patrum consensu , & cæteris aliis , quæ brevitatis ergo omittimus . Neque aliter , ut in confesso est apud omnes , ei adest Spiritus Sanctus .*

Hic , ut verba ferunt , agit Duvalius de quæstione tantum difficilima , quæ ipsos peritos torqueat , ac diffidentes inter se faciat . Videamus quid tere immediate subjecerit , loquendo de
quæ-

quæstione facilioris indaginis . Inquit enim :

Dices Summum Pontificem posse esse peritissimum , quales fuerunt olim Divus Gregorius , & Innocentius III. Igitur in eo casu solus , nemine in consilium adhibito , poterit definire . Respondeo rem definiendam interdum posse esse ita levem , & facilem , & ex alia parte Pontificem ita doctum , ut se ipso tanquam ex Cathedra eam possit definire : quando tamen gravis est , & nodosis difficultatibus implicata , proprio ingenio fidere non debet , sed peritos secum in consilium tenetur adhibere . Et hoc modo vi orationis Christi infallibiliter ei adest Spiritus Sanctus . Ex quibus liquet contra Richerium , quo sensu a Deo uni soli interdum datum sit , ut de re aliqua plus cæteris sapiat .

Ergo si semel Duvalius concedit Gregorio , & Innocentio posse rem aliquam de fide definire , non adhibitis peritis , explodit necessitatem simpliciter talem , quam impugnamus , & caute tacuit Auctor integram sententiam Duvalii , ut eum sibi devinceret . Num hæc minus sunt , quæ invidiose dicuntur ?

Perspectis *iterata defensione* sequentibus verbis Duvalii , vir eruditus hæsit in aqua ,

& innuens eum loqui de definitione rei levioris difficultatis è palæstra fugit. Deus immortalis ! Numquid est distinctio inter infallibilitatem Pontifici definientis rem fidei facilis discussionis, vel difficilioris inquisitionis ? Nullus plane hucusque ex parte infallibilitatis hoc discrevit, sed ex parte materiæ. Igitur si Gregorius, si Innocentius possunt per sese aliquando rem de fide definire juxta Duvalium, profecto necessitatem absolutam alienæ consultationis rejicit, & eliminat.

Paulo fusius oportet hanc doctrinam retexere. Divina providentia efficaciter decernens finem, necessario disponit media, quibus utendum est ad exitum finis. Ut fides Jesu Christi sanguine saginata incorrupta persisteret, contulit Ecclesiæ in Concilio sub suo Capite visibili Romano Pontifice utramque clavem, scilicet & definiendi, & discernendi verum a falso. Deesset quippe fini medium necessarium, si una, vel altera potestate careret. Verum quum plures difficultates se implicare ex temporum vicissitudine necesse sit, fuit opus, ut utriusque potestatis ministerium eidem Capiti daretur, ut data occasione

ex

ex officio exereret. Do exemplum. Exorta hæresi Ariana, per Concilium Nicænum statim confossa fuit. E contra educta ab orco hæresi Pelagiana, satis fuit Innocentius I. ad illam profligandam, quin necesse fuerit Concilium generale coire; etiamsi difficilior emerisset quæstio injecta a Pelagio, quam ab Ario, ut Theologis est clarum. Cur itaque? Nonnisi quia opus est divinæ providentiæ bono fidei opportune prospicere, & generali Concilio, & Pontifici Summo utramque clavem conferendo, quibus & discretivum iudicium, & definitivum exerceatur. Ad hæc. Quemadmodum divinæ providentiæ fuit beneficium dare Africanis Patribus unum, Augustinum clarissimi ingenii virum, qui virus Pelagianum quaquaversum effodere sapientissime valuit; perinde jure potuit dare Pontifici discretorium iudicium, quo per se se satis sit Ecclesiam Dei docere juxta temporis opportunitatem, in qua statuerat Papam de re fidei definiturum, Et quemadmodum cæteris fuisset salebrossa, & spissis difficultatibus obsita hæresis Pelagiana, uni Augustino minus gravis esse potuit; quidni uni, vel alteri Pontifici,

Deo

Deo dante , non erittribuendum , ut nunc levem , nunc gravissimam causam finire sit aptus ? Propterea tutius , justiusque censerem , abstinendum esse a restrictione proposita a Duvalio , nempe quod possit se solo rem fidei levioris momenti absolvere , secus gravissimam causam , ne videamur legem ponere divinæ providentiæ ; sed firmiter tenendum esse , Pontificem , sive solum , sive vocatis peritis de fide definientem , nunquam esse defecturum , ne in Deum blasphemæ cogamur errorem transfundere .

Quid si Pontifex temere , ac inconsiderate pronunciaret , & in fidei periculum , vel detrimentum ? Respondeo tritum hunc esse adversariorum timorem , sed multum imprudentem . Nunquid timendum est de fide divinæ promissionis ? Nunquid desperandum de efficacia divinæ providentiæ ? Volens Deus definitionem fidei per os Summi Pastoris egredi , & quæd infallibiliter doceat Ecclesiam , tenetur ei discretorium judicium dare , ut medium necessarium . Hoc judicio præditus Papa plane videbit , an auxilio peritorum indigeat , nec ne , adeoque uno , vel altero modo sibi
erit

erit sufficiens ad certissimam edendam definitionem : quinimo impossibile fore censendum est, ut temere, imperite, & infelicitè procedat in fidei detrimentum. Alioquin totius periculi nota in divinam redundaret providentiam ; quod absit a verbo .

Audio inquietum hominem adhuc urgere . Quid si Papa sibi fidens erraret ? Nonne homo est infirmitatibus suis circumdatus ? Respondeo , hujusmodi petitorum divinis promissis , divinæque providentiæ , & fidem , & ordinem negare . Obtrudam clavum clavo . Affirmant Theologi prædestinatum posse damnari , potentia scilicet antecedenti , quia est sui arbitrii compos . Negant posse damnari , potentia scilicet consequenti , ne frustaretur efficacia divinæ providentiæ . Urget utrobique sermo . Potest Papa qua homo , qua imbecillis deficere in judicio fidei , sed tantum potentia antecedenti . Verum nescit fallere , aut falli , potentia scilicet consequenti , ne frustretur divina providentia statuens per os Petri nos audire , & credere debere , & ne inanis credatur datus ordo , quem Deus posuit , connexionis scilicet

cet mediorum cum fine certissime eventuro.

Paucis repetam. Si dictum est, *per os Petri nos audire, & credere*; ergo illi datum est, posse rem fidei definire. Hoc iudicium necessario prærequirit iudicium discretivum; ergo & Petro est hoc datum. Hoc iudicio Petrus fit aptus ad discernendum, si se solo nec ne valeat veritatem inquirere, ac intelligere, prout opus est: ergo vel solus procedat ad docendum de fide, vel ex prævia peritorum consultatione, nihil ad nos pertinet inepta disquisitione, quum certissimum sit habendum, neque Deum posse nos fallere in promissis, neque nos posse falli audiendo verbum Fidei a Petro, cui jubemur credere.

Ipsæ Duvalius rem perspicue conficit, quem si integre legisset adversarius, nunquam in testem pro sua causa vocasset. Respondens quippe Vigorio objicienti, posse Papam fieri hæreticum, & hæresim docere, ait: *Pontificem mente, & corde hæreticum, si se ad aliquid definiendum aocingat, contra mentem suam definiturum. Caiphas enim prophetavit, & verum contra mentem suam definivit. Ratio vero ab Evangelista subditur, quia erat Pontifex anni illius. Deinde ponit exemplum*
de

de Vigilio PP. qui factus Pontifex impavide restitit Theodoræ Augustæ , & de Balaam a Deo mutato , ut loco maledictionis benediceret Israeli . Ubi , ut liquet , non recurrit Duvalius ad peritorum consultationem , sed ad debitum divinæ promissionis , & providentiæ .

§. XVI.

De Dominico a S. Thoma :

Velociori calamo me expediam a nonnullis aliis auctoritatibus objectis , quia perinde ac præcedens , circumcisus sententiæ verbis , ab erudito (a) Auctore referuntur . Primus occurrit Pater Dominicus a S. Thoma , qui præmittens , §. *colligitur secundo* : (b) *Quod Papa solus potest ordinare articulos Fidei* , ut docet D. Thomas 2. 2. q. 1. art. 11. , & circa illos facere novas editiones , quin possit errare ; procedit hoc idem dicere de Canonizatione Sanctorum . Cui quum objecisset hanc pendere a testimoniis , quæ falsa esse possunt , illico respondet , quod si hujusmodi

te-

(a) Pag. 11. & in iter. def. pag. 22.

(b) De Eccl. Christi contr. 117. Sect. 15.

testificationes *falsæ sunt*, Deus movebit Papam, ut illas rejiciat, quia teste D. Thom. loc. cit. Deus præservat Ecclesiam, ne in talibus per fallibile testimonium fallatur. Neque recurrit Auctor ad alienas consultationes.

Ubi autem objecta verba Dominici a S. Thoma sibi adscribit Auctor, dicentis: *Quod (a) Papa habet assistentem Spiritum Sanctum non per revelationem, sed mediis Scripturis, & prudentibus consultationibus, orationibus, ac studiis sacrarum literarum, ut nullum committat errorem*; dictum refert ad id, quod frequentius contingit, etiam quum doctissimi præsumt Pontifices, neutiquam ex necessitate absoluta peritos consulentes adhibendi, ne sibi contrarium doctum Theologum injuste proclamare cogamur. Et enim immediate ad relata verba subdit idem Pater Dominicus: *Et quamvis Papa possit sine Cardinalibus omnia negotia Ecclesiæ definire, & resolvere, neque enim ad hoc tenetur ex rigore, & necessitate, cum apud solum Rom. Pontificem sit omnis plenitudo potestatis, ut ex c. Multum 2. q. 6. & c. Cum ex eo de poen. & remis. Solus Papa enim*

(a) Contr. 237. Sect. 18.

enim habet jurisdictionem in Sede Apostolica, ad quam referenda sunt graviora negotia c. Majores de bapt. c. Rogamus, & cap. Quoties 24. q. 1. & c. Dudum 3. q. 4. Solus enim Papa habet Sedem Apostolicam c. hæc est fides 24. q. 1. tamen ex quadam decentia, & convenientia tenetur Papa Cardinales admittere ad consultationes graviores, ut colligitur ex c. Fundamenta de elect. in 6. Ubinam adversarius excutit hic necessitatem absolutam alienæ consultationis, quam ex decentia P. Dominicus exquirat?

§. XVII.

De Dominico Gravina.

AD sententiam Fr. Dominici Gravinæ discutiendam accedo admiratione correptus, quia objicitur locus Auctori (a) repugnans, neque ejus oculos facile fuit fallere. Ait Gravina eo ipso loco citato: (b) *Ad 1. Cognita prius Pontifex definit, nam vel per se, vel per sapientes controversias examinat, examinatasque dijudicat, & ad decreta formanda decenit. Si vero*
par

(a) Pag. 27. §. 9. & in iter. def. pag. 70.

(b) De supr. Jud. contr. fidei q. 1. §. ad 4. argum.

par sibi ad rem discutiendam non esset ; monet peritos consulentes adhibere , uti etiam cæteris Principibus contingit . Laudat eximius Gravina , & vocat sapientes , veluti oculos supremi judicii , quos consulens Pontifex movet , *etiamsi Theologiæ habitu careret , cum super omnia suum habeat principatum . Difficultates autem* (ab his verbis dumtaxat incipit objecta auctoritas Gravinae) *Difficultates autem scholasticæ in Accademiis facilius per sapientes , quam per Theologiæ facultatis inexpertes doctrinaliter terminantur : judicialiter vero , & auctoritative melius , imo absolute , & absque ulla contradictione a Pontifice terminantur , ex directione Spiritus Sancti moventis Pontificem cum sapientibus consulentem , ad infallibiliter controversias decidendas .* Subdit eruditus adversarius : qualem illum Pontificem vult Gravina esse motus ex directione Spiritus Sancti ? Nisi eum *cum sapientibus consulentem* . Sed , quæso integra recitetur proposita argumenti solutio , conferendo posteriora cum prioribus , & statim constabit disjunctiva Gravinae responsio . Nempe juxta superiora verba : *Pontifex vel per se , vel per sapientes controversias examinat , examina-*
na.

nataſque dijudicat : Utroque modo procedens ſemper ex directione Spiritus Sancti procedit : ergo nunquam temere , nunquam cum periculo errandi procedit . Ergo neceſſitas absoluta adhibendi Conſiliarios exulat a ſententia Gravinæ .

Illuſceſcit nitidius hæc veritas , ſi infra ad articulum X. quæſt. 2. oculos convertamus , ubi quærit : an Papa non informatus a ſapientibus poſſit , vel debeat Catholicam aliquam veritatem definire . Proponit affirmativam , & negativam opinionem ; & licet ſtatuat , ad definitionem deſiderari præviã Pontificis intelligentiam ſaltem ſufficientem , per conſulentium inſtructionem , nihilominus concludit in hæc verba : *Poſſunt autem dictæ ſententiæ conciliari , ut prima loquatur de exuberanti , & plena intelligentia definiendorum , ut non ſit neceſſaria in definiente Pontifice , ſed ſatis , ſi ſit inſtructus a Doctõribus , & Conſiliariis : ſecunda vero ſententia veritatem continet , ſi ſermo ſit de ſufficienti notitia , quam prærequiri non eſt dubium , ſive propria , ſive aliena informatione miniſtranda (ut oſtendimus) & hoc ſatis eſt , ut non inanime*

*definiens Pontifex afferatur instrumentum:
& sic omnia consonant.*

Hinc constat, Gravinam non inficiari, posse aliquando Pontificem doctiorem (ubi de Leone Magno condente per sese Epistolam dogmaticam contra Eutychetis errores exemplum a nobis ponitur) posse, inquam, proprio labore, ac studio de Fide rem examinare, ac definire, inconsultis peritis; sed vere negat inferri necessitatem absolutam alienæ consultationis. In superioribus addidi, quod quum contingat dari Pontificem doctissimum in rebus Theologicis apprime necessariis ad decreta Fidei deliberanda, censeo, ita esse loquendum: nimirum, ex efficacia, & ordine divinæ providentiæ esse debitum Pontifici donum Consilii ex motu Spiritus Sancti dirigentis illum ad incolumitatem Fidei. Deinde esse quoque eidem debitum intellectum discretionis, quo hic, & nunc sciat discernere de accommodata ad rem sui ingenii facultate; qua perpensa procedat, vel ad studium per se se comparandum, vel ad consulta peritorum exquirenda, ut exinde una, vel altera diligentia præmissa de veritate, inoffenso pede, & in-

infallibiliiter decernat . Hæc consonant tum ad laudem suavis providentiæ ordinis , & efficaciz ; tum ad inconcussam Fidei regulam , ejusque Fidei firmitatem , & decus , utpote ex Spiritus Sancti inviolabili motu , & directione descendencia . Qua Fide , si superis placet , trahitur Gravina in sententiam , quam nunquam docuit , dissimulatis iis , quæ ex professo statuit , ac firmat ?

§. XVII.

De Christiano Lupo.

Sibi in Christiano Lupo insigni Theologo præsidium statuit (a) eruditus Auctor ejus verba referens , quæ sunt ad integritatem originalem redacta , prout jacent , videlicet : (b) *Episcopalis Cathedra non est solus Episcopus , sed quotquot ipsi in publico Ecclesiæ conventu assident , & in illa administranda eidem suo consilii , aut judicii suffragio cooperantur . Quocirca Provincialis Episcopus suum presbyterium , Metropolita , Patriarcha , Papa pro Sede sua habent suas Synodos , quarum sunt præsides , os , & lingua,*

E 2

gua,

(a) Pag. 30. & in iter. def. pag. 76.

(b) Ad Can. 22. distat. Greg. 7. §. Quomodo ,

qua . Et dum ex eorum communi iudicio , ac suffragio agunt , statuunt , decidunt , loquuntur , dicuntur ex Cathedra agere , decidere , statuere , loqui .

Notandum velim modum loquendi Christiani Lupi . Siquidem perspicuè differit de Papa , de Episcopis , de Metropolitanis , & Patriarchis habentibus suas Synodos , & dum in illis ex communi iudicio , & suffragio agunt , dicuntur ex Cathedra agere . Igitur de iudiciis ecclesiasticis hic loquitur Lupus , quæ sunt communia , etiam quo ad Episcopos , non autem de iudicio Fidei proprio Romani Pontificis , etiam extra Concilium , de quo est præfens quæstio . Nisi velit adversarius Auctor imponere eximio Lupo ignorantiam Bullarum dogmaticarum , quæ in dies eduntur , nulla habita Synodo . Nunquid assident in publico Ecclesiæ conventu , ut scripsit Lupus , consulentes periti Mitrati , vel non Mitrati , Galerati , vel non Galerati , ut Silvester autumat , & permittit ? Nunquid in Concistorio Cardinalium , quod est publicus Ecclesiæ conventus , leguntur , & statuuntur Bullæ dogmaticæ communi iudicio , & suffragio , ut Lupus loquitur , qui

qui plurimum versatus est in Romana Curia, ut ei tam supina ignorantia adscribi nequeat? Quid ergo est dicendum? Nisi, Lupi proposito satis fuisse ad explicationem Dictatus Gregoriani proferre Ecclesiam Romanam non erraturam, dum in Synodis coacta sub Papa præsidente, adinstar aliarum Synodorum, communi iudicio, ac suffragio statuit, ac decidit. Censetque proinde, S. Gregorium de hac proloquutum fuisse. Sed nunquam dixit Lupus, neque disputavit, an hic modus procedendi fuerit, nec ne absolute necessarius. Procul dubio huic necessitati intrusæ ad perdenda cuncta Petri privilegia, non acquievisset, & probo. Ipse Lupus (a) in antecessum dixerat, & Pontificem, infallibilem esse in definitionibus Fidei, & morum; nec non posse refragrari integro Concilio, & quidem *solum*. Proposuit sibi (b) sermonem Petri Aliacensis Cardinalis habitum in Concilio Constantiensi, in quo contendebat suadere, auctoritatem decernendi non esse solius Papæ, sed totius Concilii, & adversantes Doctores nun-

(a) Ad Can. 21. dictat. §. expend. alia quest.

(b) §. Questionem.

cupabat detractores Concilii , & adulatores potestatis Papalis , eo quia propugnabant , standum esse sententiæ Papæ dissidentis a sententia Concilii . Ad hæc quid respondit Lupus ? En verba responsionis : *Existimo , Constantinopolitanam , Chalcedonensem , Quintam , Trullanam , ad septimam Synodos non fuisse Papalis potestatis adulatrices ; & tamen suos Canones , & alia quædam acta , quod solus Papa contradiceret , confessæ sunt esse infirma , & caduca . Adulari est crimen , sed minus est , quam detrabere , & furari . Hæc Lupus . Ergo , teste Lupo , poterit Papa , solus rejectis , vel non vocatis peritis aliquando definire : adeoque minime suffragatur Lupus adversario pugnanti pro necessitate absoluta peritorum Consultationis ad infallibilem definitionem Papæ : & apposite objectum crimen adulationis egregie retundit .*

§. XIX.

De Cherubino Romano .

PArum obest objectio petita ex Cherubino Romano , quam affert (a) erudi-

(a) ag. 40. cap. 3. & in ucr. def. pag. 83.

ditus Auctor semel, ac fufe explicata fuit in præcedenti §. doctrina perperam in ad-
 verfum propofita Christiani Lupi. En verba Cherubini: (a) *Tunc folum intelligitur Ro-
 manus Epifcopus pronunciare ex Cathedra, habeturque decretum Sedis Apostolicæ, cum
 huic præcefferit confenfio, five confultatio Ro-
 manæ Ecclefiæ, videlicet Cardinalium, Theo-
 logorum, Confultorumque; uno verbo; Majo-
 rum natu ejufdem Ecclefiæ, & Urbis*
*Haud aliter intelligi potefl decretum ex Apo-
 ftolica Sede manare, feu Papam loqui dog-
 maticè, & ex Cathedra, nifi prius fratrum
 fuorum, Majorumque natu Ecclefiæ Romanæ
 communicato Confilio. Secus enim non ex Ca-
 thedra, neque ut Caput (utpote quia efl fe-
 junctus a membris, pofthabitisque tum Roma-
 næ, tum univerfæ Ecclefiæ natu Majoribus)*
*fed ut homo privatus, adeoque errori etiam
 in fide obnoxius pronunciare intelligitur, Hu-
 cusque Cherubinus admodum hofpes in re-
 bus Curia Romanæ, in cujus fidem incaute
 prorfus adverfarius venit,*

Vult itaque Cherubinus, ut tum Roma-
 næ, tum univerfæ Ecclefiæ natu Majores
 neceffe fit convenire ad costituendum de-

E 4

cre-

(a) Ad tit. de confult. & de major. & obed. prop. §. 1.

cretum ex Sede Apostolica ; hoc est de Fide manatum . Petam festive : an Concilium Nicanum , ex 318. Episcopis tantum coactum , complexum fuerit Majores natu *universæ Ecclesiæ* ? Petam ulterius : an omnes Bullæ dogmaticæ hanc catervam hominum prævie consulentem , & consentientem prærequisiverint ? Petam ; an Innocentius I. in definitione a S. Augustino laudata adversus Pelagium , cum tot assidentibus fuerit loquutus ? Petam a viro erudito , qui facile , ac jucunde se credidit Cherubino : an probaverit in controversia de Auxiliis ex universa Ecclesia fuisse tam immensum Senatum *Majorum natu universæ Ecclesiæ* vocatum ? Apage hanc opinantis , vel somniantis fabellam , dumtaxat ad placitum modernorum hæreticorum confictam .

Quod res est . Cherubini somnium , (ne censura graviore feriam) ad fingendum valet , ut penitus obliteret infallibilitatem Papæ , sive in Concilio generali , sive extra , definientis , quod nullus Catholicus admittit . Ubi autem quis velit gratiose cum Cherubino agere , mollire sagat , juxta Lupi sensum ; nempe loqui tan-

tantum de Papa ex Cathedra definientē in coacta Synodo Ecclesiæ Romanæ ex communi iudicio, ac suffragio. Si secus sentit, turpiter errat; quia omnes Bullas dogmaticas delet, utpote carentes tam celebri, imo impossibili prævio conventu. Licet enim hæc interpretatio verbis Cherubini non consentiat: attamen ad detrudendam necessitatem absolutam consultationis, de qua hic agitur, satis est, & plurimum beneficium Cherubino inconsiderate loquenti afferet. Auctor inanem gloriam spirat Cherubino se adiungens; & silet Cherubinum velle convocandos *universæ Ecclesiæ Majores natu*; nempe *Presbyteros*, ait ipse. Prosit utrique hæc cæterva *Presbyterorum universæ Ecclesiæ*.

§. XX.

*De Ludovico Cellatio, Joanne Bagotjo,
& Francisco Combesio,*

DE his Doëtoribus in postrema iterata defensione loquitur (a) Auctor, immemor illos nunquam aut citasse, aut eorum meminisse in priori Anonymo Opusculo.
Ut

(a) In iter, def. pag. 80.

Ut non sit, hæc levia pertransimus, quam majus veritatis pondus nos urgeat. Ad Cellorium provoco.

Scriptit itaque Cellotius: (a) *Loqui (Papam) ex Cathedra, cum tres adhibet conditiones, quarum vel una si defuerit, ex edito universalis Doctoris solio, ad privatæ personæ conditionem devolvitur. I. Ex parte materiæ defumo, quam volo esse propositionem veram, vere revelatam. II. In inquisitione requiro, ut neque solus judices, neque temere pronunciet Adbibeat igitur oportet maturam, ac diligentem discussionem, sine qua Christus, ex lege ordinaria, neque Pontifici, neque Concilio infallibilitatem promisit Ut toti Ecclesiæ, ut absolute, & præcise proponat.*

Ad intelligentiam illius Clausulæ ex lege ordinaria, referamus oportet oculos, mentemque ad præcedens caput V. ejusdem libri, ubi S. Stephanum I. laudat pronunciantem contra S. Cyprianum, de rebaptizandis iis, qui ab hæreticis baptizati fuerat; *nihil innovetur, quod traditum est*; permittitque Cellotius hujusmodi decreta, etiam ab inconsulto Pontifice edici posse, etsi id su-
gil-

(a) Libr. 4. de Hier. Eccles. ap. X.

gillasset Cyprianus scribens : (a) *Prophetae duo , aut tres loquantur , & cæteri examinent , juxta dictum Apostoli ,*

Tunc sic . Univerſa antiquitas venerata eſt , ac profeſſa eſt decretum illud Stephani fuiſſe decretum Fidei ; & erraviſſe S. Cyprianum illi reluctando , Id nemo inficiatur , licet pluribus excuſandus . S. Cyprianus viſus ſit . En igitur plana explicatio dictæ Clauſulæ ; nimirum *ex lege ordinaria* , ex frequentiori uſu , qui quamdam moralem neceſſitatem induxit , tenetur Papa peritos conſulentes advocare : neutiquam ex rigore neceſſitatis abſolutæ , ne cogamur decretum Stephani infallibilitate pronunciantis ſpoliare , ſicut & de Epiſtola dogmatica S. Leonis pluries eſt dictum .

Cum Cellotio ſentit Joannes Bagotius iſdem inſiſtens conditionibus . Sed (b) & idem cap. præcedenti ſect. 2. aſſert exemplum decreti S. Stephani adverſus rebaptizationes a S. Cypriano deſenſas , prodeus verba ejusdem (c) Cypriani , quibus Ste-

(a) Epiſt. 71. ad Quintum .

(b) In Apolog. Fid. l. 4. diſp. 2. c. 3. ſect. 1.

(c) Epiſt. ad Pompejum .

Stephanum vellicabat, ac si imperite, atque improvide dicere, & scribere ausus esset, quum id non potuerit definire inconsultus contra tot Concilia Afrorum Episcoporum. Defuit ejus memoriæ aliud exemplum de Epistola dogmatica S. Leonis, qua cautior factus fuisset in disquisitione præsentis controversiæ.

Cæterum plus audet Bagotius contendendo (a) Papam nihil unquam de Fide definire nisi in Concilio. Totus est ad id probandum, nescius certe, quomodo Bullæ dogmaticæ edantur, ne cogamur suspicari, voluisse eas omnes in Fidem dubiam revocare. Accipe verba Bagotii. *Romanus Episcopus, quoties de negotio Fidei, aut aliis ad Ecclesiam spectantibus tractat, Concilium habet, & saltem Clerum Romanum ex Episcopis suæ Provinciæ, Presbyteris, & Diaconis Cardinalibus compositum in Synodo congregatum audit: nec unquam de Fide quidquam definit, nisi in Concilio. Et in fine sect. 3. in hæc verba concludit. Ex quibus omnibus concludo, Summum Pontificem, ut definiat aliquid infallibiliter, Concilium aliquod, seu Synodum au-*
dire

(a) Disp. 3. cap. 1. sect. 1.

dire oportere ; nec male dici , tunc ex S. Petri Cathedra eum loqui , seu pronunciare sententiam , cum audito Concilio pronunciat .

Hæc omnia fingere oportebat , vel debuit , a frequentiori priscae antiquitatis more aliena ; vel immemor est de usu edendi Bullas dogmaticas extra Concilium , de quibus omnino silet Bagotius ; vel quia ad munendam improbabilem opinionem necesse erat plura ex arbitrio comminisci ; etiam extra culpam , quia nunquam forte Romam vidit . Destructo igitur fundamento ruit opinio Bagotii , & nihil favet adversario , nisi figmentis delectari placeat .

Nunc ad Franciscum Combessium accedo , qui scripsit : (a) *Pontificem loqui ex Cathedra , est loqui cum fratrum consilio ex communi Ecclesiae sensu .* Unde id hauserit Combessius , nemo divinabit , quia nullibi id probat . Opinio , quæ nullo nititur rationis , vel auctoritatis , traditionisque momento , maxime in re dogmatica per sese corrumpit in ortu . Præterea labat utrinque allata loquendi ex Cathedra descriptio . Quando enim adest communis sensus Ecclesiae non occurrit necessi-

tas

(a) Tract. pro act. 6. Synod. c. 2. §. 3.

ras loquendi ex Cathedra ; bene vero quum de interpretatione Scripturarum , de intelligentia Sanctorum Patrum , vel de Theologorum discrepantia disputatio oritur , ut inde communis sensus Ecclesiæ per Papæ definitionem determinetur , & ut oertus proponatur tenendus. Si disceptatio contingit de ipso communi sensu Ecclesiæ , ut fuit illa inter S. Cyprianum & S. Stephanum , & alia de celebratione Paschæ inter Ecclesias Asiæ & Victorem I. PP. , est ne petenda definitio a communi sensu Ecclesiæ , aut vero ab auctoritate infallibili definientis , quisnam sit tenendus pro communi Ecclesiæ sensu ?

Igitur Combefissius non adamussim decocta materia loquutus est , sed rudi minerva , dicturus certe verius si exactius ad examen processisset , inquirendo quid possit Papa per se se salvo privilegio suæ infallibilitatis in iudiciis ex Cathedra. Hæc Theologi auctoritas sic lenita probabilitatem conciliat ; aliter dicentis nihil efficit : & optime interpretamur loquutum de usu frequentiori , non autem de necessitate absoluta alieni consilii .

§. XXI.

De DD. Cardinalium Privilegiis.

OMnem laudem amplissimis Cardinalibus tribuit (a) eruditus Auctor. Dignitatem veneratur, jura, celebrat, auctoritatem colit. Coadjutores, & Collaterales Papæ, universum orbem cum illo judicantes, ex. Bernardo (b) prædicat: Consiliarios Pontificis, & Conjudices orbis terrarum, cum Pio II. (c) nuncupat. Eos esse, ex quorum consilio, & assensu Pontifex regit, & gubernat universam Ecclesiam, cum Joanne Cardinali a Turrecremata proclamat. Eorum consultationem esse necessariam cum frequentiori calculo Doctorum in decretis, describit. (d) Cardinales esse, quasi in possessione, quod ipsorum consensus in hujusmodi causis requiratur; & in negotiis expediendis consensus majoris partis procerum requiritur, cum (e) Abbate

(a) Pag. 85. §. 3. per tot. & in iter. def. art. 3. pag. 27.

(b) Libr. 4. de confid. cap. 4.

(c) Orat. ad Card.

(d) Cap. Vener. tit. Qui fil. sint legit.

(e) In cap. litteris n. 13. de rest. Spoil. Cons. 137. n. 6. & 7.

te Panormitano & cum Zabarella memorat.

Optime quidem, & augustiora etiam deprædicata, præ cæteris ad veritatem, & non ad fucum, ab Abraham (a) Bzovio, approbo, concedo. Sed, quæso, ne hujusmodi præconia sint in perniciem absolutæ a vinculis Pontificiæ infallibilitatis, & in injuriam Petri, ac Christi Pontificis æterni. Nihil ad rem conferunt prædicta. Necessitatem congruitatis evincunt, non necessitatem absolutam adfistentiæ, & consilii. Venericus Schismaticus & rebellis Episcopus, (b) ut promoveret Antipapæ Guiberti Pseudo auctoritatem, spoliavit, & ipso nomine Gregorium VII., infamavit, contempsit, & criminatus est, dicens: *Postquam aliunde ascendit in Papatum, a consilio removit Cardinales Sacræ Sedis, . . . ejeçtis a consilio, & custodia ejus Cardinalibus, vita ejus, & fides, & doctrina fuit sine testibus.* Affirmat judicasse ex arbitrio proprio absque Cardinalium consultatione, & propterea lapsum a Sancti Petri privilegio errasse, & jure dejectum,

at-

(a) Tract. de Rom. Pont. c. 33.

(b) L. de conserv. Eccl. Unit. advers. Greg. VII.

atque exauctoratum fuisse: Ejusdem fur-
furis & sensus fuit Benno Cardinalis, qui
vasserrime consilii & prudentiæ laudes
Cardinalibus impendens, temeritatis, &
ignorantiæ insimulabat S. Gregorium VII.
quia inconsultis Cardinalibus ageret. Do-
na Danaum sunt valde cavenda. Con-
tra laudatur Adrianus PP. qui ad lenien-
dam indignationem Guilielmi Siciliæ do-
mini ob denegatum Regis titulum, & ad
cohibendas depopulationes, ab ipso inve-
ctas in Apuliam, & Beneventum, *reniten-
tibus Cardinalibus Adrianus indignatus om-
nia Guilielmo, ut petierat, indulxit, titulos-
que prædictos attribuit*; ut narrat liber Pon-
tificialis, & Robertus Abbas Montensis in
Chronic. ad ann. 1157.

Sunt igitur amplissimi Cardinales Con-
siliarii Papæ; sint in quasi possessione im-
pendendi, & superimpendendi suum Pon-
tifici consilium. Propterea non intendunt
arctare, & cogere Papam, ne quidquam
absque eorum suffragio, & assensu etiam
in arduis decernat sub pœna nullitatis,
maxime in irretractabili Fidei negotio. Imo
usque ad sanguinem pugnaturi declamant,
defendere quum de privilegiis primatus,
F & in-

& infallibilitatis Papæ ratio occurrit . Notissima est expositio Cardinalium ad Eugenium III. in Concilio Remensi adversus Gilbertum Porretanum coacto , quum insonante voce conditi novi Symboli a Sancto Bernardo , una cum Gallis Episcopis , in sciiis ipso Pontifice , & Cardinalibus adfidentibus , exarserunt dicentes : (a) *Quid fecit Abbas tuus , & cum eo Gallicana Ecclesia ? Qua fronte , quo ausu cervicem contra Romanæ Sedis Primatum , & apicem erexit ? Hæc est enim sola , quæ claudit , & nemo aperit , aperit , & nemo claudit . Ipsa sola de Fide Catholica discutere habens a nullo , etiam absens , in hoc singulari honore pati præjudicium potest .* Quibus consideratis Natalis ab Alexandro adnotat sequens Commentarium : (b) *Ex hoc facto aliqui quidem perperam colligunt , causarum Fidei judicia non ad Episcopos quoslibet , sed ad unum Romanum Pontificem cum Collegio DD. Cardinalium pertinere . At id ex ista Cardinalium expositione nequaquam consequens est , sed solum , quod finitivam sententiam in causis Fidei dicere Juris sit Romani Pon-*

(a) Otto Frisigen. de gest. Fred. I. 1. c. 57.

(b) Ad secul. 12. dissert. 8. n. 2.

Pontificis : nec Fidei Symbolum Ecclesiæ proponendum universæ Episcopis edere liceat , S. R. E. Cardinalibus , & Summo Pontifice inconsultis , maxime in Synodo , cui adsunt .

Insuper peremptorie res conficitur alato exemplo Magni Leonis scribentis Epistolam dogmaticam pluries laudatam . Certissime tenendum est , ei non defuisse Spiritus Sancti assistentiam , neque defecisse in iis , quæ sui erant officii , faciendo quod in se est . Quumque par sibi fuerit ad enodandas rei difficultates , ad perscrutandas Scripturas , & evolvendam Patrum traditionem , ut ipse in suis epistolis explevisse proprio studio , ac labore declarat , pro certo quoque habendum est , ipsum solum , absque aliorum consultatione , indeficientiæ munitum privilegio hæresim Eutychetis fudisse , & Catholicum dogma constabilivisse . In Domino gloriatu Leo Magnus scribens ad Julianum Episcopum Coensem , ait : (a) *In causa Fidei , quidquid pro nostro officio agi potuit , ac potest , juvante Domino , & sollicitè , & libenter exequimur ... Propter quod , omnibus no-*

F 2

tum

(a) Epist. 91. cap. 1. & 97. & epist. 69. ad Marcian. epist. 67. ad Monac. Palestin.

tum est, non destiti laborare, ut manifestata, atque defensa Incarnationis Dominicæ veritate, omnis fraternitas, quid ubique secundum doctrinam Apostolicam & tenendum & docendum esset, agnosceret. Confirmat uberius proprii laboris partum esse sæpe dictam dogmaticam Epistolam, ubi ad Leonem Augustum scripsit: (a) *Promisisse me memini, in causa Fidei, de qua clementiam tuam novi pie esse sollicitam, pleniorum humilitatis meæ dirigendum esse sermonem. Quod quidem implevit instructa epistola ex omnigena eruditionis doctrina per allatas integre auctoritates tum Evangelici Textus, cum Sanctorum Patrum congestis testimoniis.*

Errat porro quisquis minoris putat Leonem Magnum; vel cogitur probare, quod Cardinales, vel peritos ad consultationem adsciverit. Sin minus sibi soli assentatur, & sua tantum verbis committat. (b) Hæc totidem repetita laus Epistolæ dogmaticæ S. Leonis undequaque infallibilitatem auctoris sui spirantis erudito viro displicet, ac nauscam movet.

Nec

(a) *Epist. 134.*

(b) *In iter. def. art. 8. pag. 113.*

Nec mirum , quia ad vomitum redire compellitur . Præteriens enim producta testimonia ex Epistolis S. Leonis convolat ad arcescendam infallibilitatem Epistolæ dogmaticæ ad Flavianum a posteriori examine , approbatione , & consensu Concilii Chalcedonensis , juxta placitum osorum Pontificiæ indeficientiæ ; de qua fufe actum est in libr. de privil. Rom. Pont. Sicque traducens illam de fovea in foveam , nunc ad consensum prævium revocat , nunc ad consensum posteriorem ablegat , prægrandi inconstantia diris omnibus devovenda .

§. XXII.

De eodem argumento :

Sint amplissimi Cardinales orbis iudices , juxta elogium Divi Bernardi ; sed accipiat eruditus Auctor , ejusdem ibi insertum monitum Eugenio datum : (a) *Tibi (Eugeni) imputa quidquid patieris ab eo , qui sine te potest facere nihil* . Sint conjudices terræ juxta encomium Pii II. Utroque pollice subscribo . Apostoli quoque iudices , & conjudices Christi in die extremo sedebunt

F 3

ju-

(a) Ex libr. 3. de Cons. loc. cit.

judicaturi duodecim tribus Israel ; quin-
 judicio æterni judicis se implicaturos agno-
 scant ; nisi per judicium approbationis ,
 juxta Divi Thomæ Commentarium ; quod
 idem sapit , (a) ac esse judicium obedi-
 tiæ , proprium inferioris , cui non liceat
 dissentire , vel refragari . Sunt autem Car-
 dinales amplissimi judices ad ferenda ju-
 dicia in Curia *pro mansuetis terræ* , ut lo-
 quitur Divus Bernardus : *Nec jussi renuant*
 (inquit) *nec non jussi affectent* ; Reservato
 semper soli Pontifici judicio finali de rebus
 Fidei , & morum , & salvo arbitrio illos ad-
 hibendi ,

Me latet , fateor , quid in hac discep-
 tatione sibi præstituerit adversarius , Ex-
 pōcit necessario absolute consilium præ-
 vium ad Papæ definitionem de Fide . Sed
 a quibus petendum sit , adhuc ipse igno-
 rat , Hic omnino , ex consiliarii nativo
 munere , vult amplissimos Cardinales esse
 adhibendos . Mox Silvestro cohæret , satis
 esse , si fuerint Galerati , vel non Gale-
 rati . Cum (b) Driedone (repugnante
 Cano , cui jactat inhærere) permittit exa-
 men

(a) In Matth. cap. 16.

(b) Pag. 27. in fin.

men de adhibita', vel non adhibita diligentia in iudicio discretivo Pontificis. Juxta (a) Cuperfium advocat de jure divino Cardinalium consultationem : Sed cum (b) Turrecremata implicat doctos Patres, & florentissimum Clerum, Ex (c) Duvalio viros utcumque peritos approbat, & est contentus. Ad placitum Gravinæ se conformans Juristas, Theologos, florentissimum Clerum, vel Congregationem S. Officii vult cogi; sed cum (d) Alphonso de Castro sibi suadet, satis esse aliquos Cardinales, aliosque doctrina præstantes. (e) Lupo accedit coacervando ad consilium quotquot in publico Ecclesiæ Conventu assident, & administrationi Ecclesiæ cooperantur, Verum statim cum (f) Cherubino Romano omnes etiam *natu Majores totius Ecclesiæ* pro orbem diffusæ declarat a Pontifice, per consilio esse adhibendos. Et hic videtur conquirere, exclamans: *Quid aliud, per fidem numinum? dixi ego?* Tandem præcedentibus dictis posthabitis concludit, Magistro (g) Cano perpetuo inhæsisse, &

F 4

ad-

(a) Pag. 29. init. (b) Pa. 29. & pag. 30. ante med.

(c) Pag. 33. circa med. (d) Pag. 31. in fin.

(e) Pag. 39. post. med. (f) Pag. 40. in fin. (g) Pag. 44.

adhuc inhiærere . Sit laus Deo , quod accepta veritate , cætera ad eruditionem tantum prolata sapienter obliterentur .

Sed pergit vir eruditus (b) ad poscendam tot consulentium multitudinem , prævie ad Pontificiam definitionem Fidei , *ut rite , canonice , authentice , sollemniter , & ex Cathedra , seu ex Tribunali Pontificio iudicium ferant (Pontifices .)* Poterat a Bagothio loc. cit. insimul discere , quantum differat Cathedra a Tribunali , quod solum respicit Forenses causas . Ut ut sit : ecurr etiam non postulat , ut omnes subscribant Bullis dogmaticis pro complemento solennitatis celebrioris ? Ita factum est , inquit Auctor , a Petro in disceptatione usus Legalium . Bene . Sed cur , juxta hoc exemplum , non exposcit convocationem Concilii Generalis , quoties de Fidei rebus conquirendum est ? Igitur ineptum ad rem est exemplum allatum , quia convocatio Concilii non erat simpliciter necessaria , quemadmodum nunquam probabitur absolute necessaria convocatio peritorum , & allata solennitas . Idcirco pure , & strictim dixit Pe-

(b) In iter. det. pag. 118.

Petro Christus : *Pasce oves meas : Confirma fratres tuos* . Nihil addidit Antiquitas, nihil addunt citati Theologi de necessitate, exceptis osoribus Pontificiæ infallibilitatis, qui ad arbitrium fingunt Petri Cathedram.

§. XXIII.

De quadam querela Cardinalium.

Argumentum deductum a quodam supplici libello dato Benedicto XIII. P. M. anno 1727. a Cardinalibus num. 24. subsignatis, occasione rumoris diffusi de arduo negotio propediem, illis inconsultis, erupturo, ac finiendo a Papa ad instantiam Magnatis; quod præter rem refricat eruditus (a) Auctor, præsentem, postulat animadversionem. Locum sibi putabant apud Pontificem querendi, cur in illa negotii arduitate ipsi Cardinales consulti non fuissent, quum *utj Consilarii nati Summi Pontificis jure debeant ad consultationem adhiberi, & audiri in gravioribus Sanctæ Sedis negotiis*. Hæc verba, hæc summa argumenti. Si quid simile peterent *Majores natu universæ Ecclesiæ*, quibus ex
Che-

(a) Pag. 16. & in ite. def. pag. 30.

Cherubino Romano tam magna tribuit Auctor, nescio ipse, quid responderet.

Dico fallaciam in argumento cubare. Aliud est quærere, quid jure possit Senatus, aliud quid jure possit supremus Monarcha. Noverit optime eruditus Auctor posse Senatum jure suo, scilicet ex sua institutione contendere, etiam irrequisitum, suum consilium exhibere, imo ultro inferre, imo ex zelo boni publici, siue veri, siue putativi obturatas etiam Principis aures, & reluctantes iterum iterumque pulsare. Scit ipse quot exempla (a) Gallicana proferre possim, ubi tamen Monarchicum nomen, eodem Auctore teste, digne extollitur. Identidem noverit, posse quoque Monarcham jure suo utentem inconsultis Consiliariis, vel non attentis consiliis, aut oblatis, aut invecitis, rem rite peragere, atque decernere. Hinc fit; ab illo jure descendere, quod Consilarii ex flagranti amore erga suum Principem, & boni publici studio, possint adhuc cum Monarcha justam habere querelam, & expostulare vehementer, cur ipsis inauditis ad ulteriora procedat. Verum nemo arcebit

Mo-

(a) Vide historiam Concordati apud Petrum Pithæum,

Monarcham , quin etiam suo jure utens possit omiſſis Conſulentibus , eorumque conſiliis , atque querelis , juſte juſta perficere . Non negabit Auctor ſuis edoctus exemplis . Quod dixi de ſupremo Monarcha , cur inſicias ibit in Pontifice Maximo ?

Jam ſuperius dedi exemplum de juſta querela Cardinalium apud Eugenium III. Jure id factum aſſero . Aliud exemplum aſſerre poſſum de juſta querimonia cum Paſquali II. , & ante , & poſt datas inveſtituras Henrico . Sed quid inde ? Nunquid omnia ad Ariſtocratiam trahenda , ut infecta jaceant ? Nonne ultro dedi poſſe Cardinales ampliſſimos , maxime præ cæteris , corrigere , corripere , obſecrare , atque graviter , ſi opus eſt , repræhendere Summum Pontificem , eidemque ſuccenſere ? Sed quid ad rem noſtram , ubi de infalibilitate judicii agitur , nempe non de retractabili conſeſſione , ut fert exemplum Benedicti XIII. , ſed de irretractabili definitione Fidei , cui de Fide eſt , ineſſe aſſiſtentiam Spiritus Sancti falli , & fallere neſciam ?

Accipe exemplum aliud Benedicti XIII. cui neceſſe eſt conquieſcere , utpote
ad

ad rem accomodatissimum : Vergente ad postremam sessionem Concilio Romæ in Laterano a Benedicto XIII. coacto, quaesitum fuit, quæ formula subscribendi usurpanda foret a Patribus. Quæstio erat, an subscriptio Patrum Actis consignanda fieri debuisset per verba simplicia *N. N. subscripsi*, aut per verba *N. N. consentiens subscripsi*. Zelo decoris, auctoritatisque, supremæ Romani Pontificis incensi DD. Cardinales numero 30. tunc Synodo assidentes, & Romæ degentes, sub die 27. Maii 1725. subscriptum a singulis supplicem libellum Pontifici obtulerunt, in hæc verba : *Non posse tuta conscientia in subscriptione Actorum Concilii uti verbo Consentiens, quia evidens in januis est periculum, ne maxima pugna insurgret adversus supremam Pontificiam auctoritatem, usque ad vulnus inferendum Apostolicæ Sedis dignitati. Eo quia id præpostere acceptum iri ab adversariis proclive est, perinde, ac Patres assidentes una cum Papa fuerint Coniudices, atque Conlegislatores; vel inde trabentes adversarii ut necessarium Consecrarium, vacuas, sive pendulas evadere Pontificias Constitutiones, nisi per Patrum consensum plenum*

robur obtinerent . Urgentius sub die 29. Maii repetito supplici libello apud Benedictum XIII. institit sacrum Cardinalium Collegium , in hæc verba : Quum Cardinales sacramento se obstrinxerint defendere , etiam fuso sanguine , auctoritatem Summi Pontificis , & alias probe scientes , quantâ improbitas temporum , & hominum malitia instet , ad perdendam , vel imminuendam supremam hanc auctoritatem , continuo intenta , compulsi sunt , pungente conscientia , rursus rogare , ac instare , ne permittat verbum consentiens , quod nullatenus ipsi adhibere intendunt , parati tamen , ac prompti ad subscribendum per verbum simplex subscripsi . Infracto animo steterunt , & ubi primo censebant non discedere a consueto modo subscribendi Apostolicis Bullis , nunc flexi fuerunt ad addendum verbum subscripsi , uti factum fuit . Non ignorabant amplissimi Cardinales pluries in aliis Conciliis usos fuisse Patres verbo consentiens , ut ipsi innuebant . Sed crescente veneni acerbitate opportunum hoc antidotum prævertere , & ut necessarium urgere censuerunt .

Recolat , quæso , eruditus Auctor huius facti circumstantias , distincteque perpen-

pendat , quantum studium Cardinales impendant , ut jura Pontificia inviolata custodiantur . Et discat . apprime menti , & cordi eorum altius insidere jura Pontificia , quam propria ; neque quidquam majus esse eorum animis infixum , quam intendere , præcavere , & docere , Papam esse vivam Regulam Fidei unice connexam cum assistente Spiritu Sancto , a quo juxta pollicita , opportune est dirigendus , & ut consulat peritos , quando opus est , & ut iis inconsultis , quando opus non est , de Fide agat . Certi enim sumus , Spiritum Sanctum non posse Ecclesiam suam fallere , adeoque neque posse permittere , ut Pontifex Maximus temere , aut suo deceptus arbitrio de Fide , vel moribus definiat . Ex dictis (iterum) hoc unum colligere est , in factis recensitis certare quidem in Cardinalium Collegio zelum , & studium servandi incolume infallibilitatis Pontificiæ privilegium ; & pro aris , ac focus illud tuendi , oppugnantesque conterendi ; sed nunquam sibi arrogandi quidquam , vel minimum , quod jus hujuscemodi lædere , aut vellicare unquam possit . Fallitur proinde quam maxime quisquis similibus technis
utens

utens, per cuniculos artificiosæ laudis in Cardinales effusæ, pertentat, ut suos fines quaque versum excedant.

Hic tanquam quid reconditum profert Auctor, Ecclesiam Romanam ab initio suum habuisse Presbyterium in arduis consultum. Addere poterat frequentius legi in historia ecclesiastica fuisse in Concilium coactos Episcopos finitimos ad rem, maxime de Fidei negotio, deliberandam. Sed quid inde? Factum exsolvit; sed quid fieri potuerit, etiam sine illis, non attingit. Mihi non credit; credat Duvalio ab ipso laudato, aliisque Doctoribus ab ipsomet allegatis, jam supra excussis, qui hanc necessitatem absolutam alienæ consultationis adeo perspicue explodunt, ut vel hebes oculorum acies videre potuerit.

§. XXIV.

*De inveſta explicatione contrarii
assumpti.*

UT obseptam ab urgentibus difficultatibus opinionem suam expediret eruditus Auctor, coactus est novis explanationibus declarare, quid sibi in animo fue-

fuerit, quum de necessitate absoluta Consulentes adhibendi ad iudicium definitivum Papæ, in rebus sive Fidei, sive morum, perficiendum differit. An cohærentia sint, nunc sermo recurſat. Ait itaque, (a) *Summi Pontificis iudicium pendere quidem ab illa peritorum, sapientum, ac multo magis Cardinalium, facta consultatione, quaesitoque consilio, habitoque consensu, tamquam a mediis ad obtinendam a Deo infallibilitatis gratiam necessariis*; Non autem ut intelligi debeat, hoc medium, & conditionem intercedere oportere, (b) *tamquam fontem, aut originem, aut causam effectricem Pontificiæ infallibilitatis*. Hoc etiam modo loquens de Ecclesia Romana explicat, hanc quidem assensu suo ad indeficientiæ culmen, ut medium, & conditionem associari debere, sed nunquam infallibilitatem iudicii efficere, quæ solius Dei opus credendum est.

Res tamen adhuc sic explicata immagnas difficultates delabitur. I. Adhuc intellectus lectoris expectat, unde, ubi probetur necessitas absoluta huius medi, & con-

(a) Pag. 45. §. 8.

(b) Pag. 47. & in iter, def. pag. 107.

& conditionis, de quibus filet Evangelium, non meminit Traditio Patrum, & ipsi citati Doctores nihil aliud interponunt, quam opinionis arbitrium. Et quia nemo alteri cohæret, ut lucide ostensum est, neque ad auctoritatem venerabilem opinionis, in re tam maxima, valent pervenire. Excipio majorem Doctorum numerum, quos ex allegatis mecum stare ad evidentiam demonstravi. II. Comper-
tum est ex Philosophica regula, medium absolute necessarium, ad illud genus causæ spectare, cui inservit. Id ostendam exemplo dato ab (a) Auctore. Intentio Ministri in Sacramentis conficiendis, cum eodem effective (b) influit in Sacramentum. Actus vero poenitentis simpliciter necessarij ad effectum Sacramenti penes causam materiale se tenent. Eccur Consultatio peritorum ableganda est a causalitate effetrice infallibilis judicii, si datur ut medium, & conditio absolute necessaria? Cur id inficiatur Auctor?

Fortasse confidit, quia infallibilitas est Dei donum. Sed nihil relevat. Esto

G

effe-

(a) pag. 45. init. & 46.

(b) Gotti Card. tom. 13. q. 7. dub. 3. n. 3.

effectus Sacramenti sit gratia, quæ Dei donum est, attamen Minister, & intentio suo modo causam effectricem Sacramenti complent, cui inest gratia, vel fluit. Quidni erunt Consulentes suo modo cum Papa causa effectrix iudicii dogmatici, cui infallibilitas inest? Fortius. Infallibilitas est data Petro active utenda. Ergo quidquid Petro adjungitur, ut medium necessarium, est activum suo modo principium indeficientis iudicii. Ergo suo modo est auctor infallibilitatis; quemadmodum intentio suo modo est effectrix gratiæ.

Neque dissentire amplius liberum est Auctori (a) *de Romano Pontifice falli & fallere nescio differenti*. Ejus quippe animo alte infedit, consulentes, & per consulentes ipsam Ecclesiam Romanam esse cum Papa Judicem pronunciantem iudicium infallibile Fidei. Insuper Ecclesiam Romanam sic pronunciantem gaudere infallibilitatis munere. Rursus Ecclesiam dictam Romanam specialem in munere, tam activo, quam passivo, ita infallibilitatis privilegio frui, ut etiam Papa errante, illa prorsus erroris futura sit expers. Ad-
do,

(a) Dissert. 1. pag. 6. & 9.

do, illum docuisse plus infallibilitatis dono ditatam Ecclesiam specialem Romanam, quam Ecclesiam Universalem, quia labente Papa necesse esset universam Ecclesiam labi, & corrumpi, a quo periculo unam excipit Ecclesiam Romanam specialem. Ubinam est hic locus negandi influxum effectivum in definitionem, vel iudicium Fidei? Sed hæc sunt, audio, projectæ adulationis cavillosa argumenta. Alius tamen reponet, illud esse furari, ut Lupus ait, Papæ suum infallibilitatis privilegium.

Prælaudatus eruditus (a) Auctor vult infallibilitatis privilegium æque ac immediate donatum fuisse a Christo & Petro & Ecclesiæ. Demus etiam osoribus Pontificiæ infallibilitatis, per trasennam, Papam esse Caput ministeriale Ecclesiæ. Tunc sic. Nemo inficiabitur, Papam ex officio agentem, in utroque sensu, esse os, & linguam Ecclesiæ, ut Christianus Lupus supra citatus loquitur. Hac methodo osoribus prædicti, una cum Auctore, tribuunt Concilio Generali infallibilitatem iudicii; est enim & istud os & lingua Ecclesiæ. Concilium Nicænum inconsultis peritis a

G 2

Con-

(a) Loc. cit. cap. 4. pag. 31.

Concilio alienis fuit os & lingua infallibilis Ecclesiæ in lato iudicio. Quare? Quia nemini alteri datum est hoc privilegium; neque ex hominum arbitrio instituenda est alia Ecclesia illigata mediis, & conditionibus ex necessitate absoluta requisitis, quas Christus minime præscripsit. Et quis recte cogitabit Pontifici ex officio definienti, ut est os, & lingua Ecclesiæ, organumque Spiritus Sancti, injiciendum esse vinculum sive mediū, sive conditionis ex necessitate absoluta, quod Christus præterit, quod Ecclesia per tot sæcula nullatenus indicavit, & dumtaxat post Schisma Basileense unius, vel alter opinator incohærenter invexit?

Quid? Quod idem eruditiss. Auctor eadem manu, qua extruit necessitatem simpliciter adhibendi consulentes peritos; intentum, & dicta confestim diripit, & vastat? En verba; (a) *Contingere potest, ut Pontifex hæc ipsa, quæ dicimus mediā, a divina providentia definita, aut ab humana prudentia dictata, adhibere omnino non possit. Magna vis veritatis, quæ etiam nolentem trahit! Cujus generis est hujus sermonis disjuncti-*

cti-

etiva? Profecto vel dubitantis mens pendula, vel utriusque partis acceptio assertiva. Ecquis tantis cervicibus erit, ut evincere doctos valeat; medium ab humana prudentia inductum prorsus jugum impositurum Pontifici, & quod lepidum est, de jure etiam divino, ut sapissime inculcat, adeo ut sine hoc medio laturus de Fide, judicium indeficientiæ privilegio sit spoliatus? Quod si intelligere velit permissam prudentiæ humanæ electionem singularem Consulentium; cur toties petit, & repetit jure divino esse designatum florentissimum Clerum, deinde suspectos amplissimos Cardinales, postmodum, variata formula, vel Galeratos, vel non Galeratos satis esse? Scio equidem quædam jure divino statuta, fuisse dimissa auctoritati Ecclesiæ complenda in specie per adpromissam assistentiam Spiritus Sancti suggerentis, ut de quibusdam Sacramentis legimus, Sed nunquam legere est, non auctoritati, sed prudentiæ hominum concessum esse, novum jus divinum posse condere, illudque minus ad placitum transferre, ac moderari more figuli. Plura redundant; quia nimia absurditas abunde per se loquitur.

De absurdis evasionibus ;

FUtilem Apologiam sibi comparat Adversarius , dum nervoso studio absurda evacuare satagit . Primo in eo versatur , quid respondendum esset in eventu , quo Summo Pontifici Consulentium copia præsto ei non esset , Tunc dicit , relinquendum esse divinæ providentiæ , (a) quæ modo extraordinario tribuet media necessaria ; uti in defectu ministri conferentis baptismum docemur supplere , & satis esse baptismum flaminis . Nihil ad propositum . Quæstio postulat , quid sit dicendum de absoluta necessitate Consulentium in Pontifice laturo judicium de Fide , prout passim occurrit . Quod an possit suppleri a Deo in alia providentia etiam sine Papa supremo Judice controversiarum , non est inquirendum . Silet de hoc antiquitas , silet traditio , Quæstio inquit , an Leo Magnus exarans definitionem Fidei in sua Epistola dogmatica ad Flavianum , absque aliorum consultatione , & assensu , subierit

er-

(a) Pag. 51. init. & in iter. def. pag. 108.

errandi periculum . Auctor affirmat , absque Textu Evangelico , absque Patrum traditione , absque Doctorum irrefragabili fulcimento , absque rationum pondere , solo innixus opinantium paucorum , sibi neque cohærentium , ut vidimus , auctoritatis nomine . Nos contra pugnamus , præluce evangelicum Textum , quo Petrus solus constitutus legitur Pastor ovium omnium , & alterum , quo solus institutus est doctor , & magister omnium per illa verba : *Et tu confirma fratres tuos* . Accedit silentium totius Antiquitatis , quæ nunquam cogitavit de adjungenda necessitate consultationis , unde exceptio de novitate satis est in re maximi momenti ad confutationem opinionis .

Petrus congregavit Jerosolymis Apostolos , & Seniores , ut (a) disceptatio de usu legalium communi conquisitione dirempta esset . Nemo dixit , fuisse id inductum ut necessarium medium a successoribus absolute adhibendum , Idem Petrus lucide rem explicat , dicens : *Vos scitis , quoniam ab antiquis diebus Deus in nobis elegit , per os meum audire gentes verbum*

G 4

Evan-

(a) Act. 15.

Evangelii, & credere. Protulit immediate sententiam ab omnibus laudatam, & scriptum fuit decretum. Ex his discimus, permissam conquisitionem, non ex necessitate absoluta factam fuisse, sed quia conveniens duxerat Petrus ad partes disceptantes sedandas medio Concilii uti. Leo quoque Magnus optime conscius indeficientiæ sibi à Christo traditæ, cum independentia à quolibet necessitatis medio, in hæc verba scripsit, se permisisse Concilium, Chalcedonense, licet Deus (a) nostro prius ministerio definierat ..., ut Concilium vere à se prodiisse ostenderet, quod prius à prima omnium Sede firmatum fuerat. Hæc coherentur cum his, quæ ad Flavianum scripserat; (b) rem, de qua agitur, nequaquam Synodali indigere tractatu. Argumentum, hinc validum sumitur, Et Petrus, & Leo absolutos se agnoscentes à necessitate Concilii cogendi, ob indeficientiæ sibi notam prærogativam, ad convenientiæ, & suavis agendi rationis titulum, hujuscemodi medium dumtaxat adhibuerunt. Ecce coacti erunt dicendi ad vocandos hos, & il-

(a) Epist. 63. ad Theodor, Cyr, ep,
 (b) Epist. 16.

& illos Consiliarios, semel ac nec Petri exemplum necessario cogit ad colligendum Concilium?

I I. Fingit Auctor (a) eruditus nullatenus percipere, cur argui debeat de impacta fallibilitate Pontifici, si peritos non advocet, quum ejus personam infallibilem, etiam identidem agnoverit, & declaraverit. Fingit, inquo, quia fortasse non attenderit ad illum præclarum titulum libri: *De Romano Pontifice falli & fallere nescio*, Titulus absolutus absolutam pollicetur resolutionem, Ad hæc magnifica, invitatus lector jucunde librum pervolutat, sed statim in prioribus paginis offendit: (b) *Si de Pontifice nulla Sedis suæ habita consultatione, nullo illius accedente consensu, disputarent; haud ægre concederem Pontificem errantem*, En præclara laus tituli! en Thesis! Illud ne est, repōnit Auctor, in sola Ecclesia Romana infallibilitatem agnoscere, non item in Summo Pontifice? Proh Sancte Deus! Si utrique data est infallibilitas judicii, imo Pontifici cum dependentia ab Ecclesia Romana, ut a conjudice simul pro-

(a) §. 8. pag. 52.

(b) Dissert. 1. pag. 9.

pronunciante, nonne titulus fallit, & expectatio boni lectoris confestim fallitur? Nonne est abducere fidelem animum potioris, & amplioris mundi partis, cui alte hucusque infixum est, uni Petro datum esse Summi Pastoris, & Summi Doctoris munus, & decus: adeo ut ipsum Concilium, universamque Ecclesiam pendere necesse sit a Pontificio iudicio, nequiquam istud ab illa, ne duo Capita, ne duo Pastores, ne duo Doctores maximos cogamur fingere, contra Christi statutum? Hæc si pensâ examinetur Auctor, æquioris animi erit.

Rejicit (a) vir eruditus hoc confectarium, sed frustra; semel dato per ipsum infallibilitatis dono in Ecclesia speciali Romana, Et eo magis, quia, ut vidimus, hanc specialem Romanam Ecclesiam eximit a dependentia Papæ: quia errante Papâ docet universam Ecclesiam, erraturam fore; ubi vero agit de Ecclesia speciali Romana a periculo errandi eam liberat. Quid hæc gestiunt, nisi unam dependentem a iudicio Papæ statuere, alteram absolvere. En duo Iudices supremi; en duo Doctores inter se absoluti;

en

(a) In iter. def. pag. 180.

en Papa non amplius organum Spiritus Sancti, sed vel sui ipsius, vel ejusdem specialis Rom. Ecclesiæ. Ex quo duo absurdiora fluunt: nimirum & quod Ecclesia Romana specialis sit per se infallibilis, & quod potiori infallibilitate præ Papa gaudeat.

Pergit vir (a) eruditus sibi suadens non ita id sequi, *quia in priori hypothesis, Pontificis errorem in Ecclesiam refusum iri, utpote quæ Pontifici erranti dedisset assensum, in secundo non item*. In vortices se se oratio involvit. In utraque hypothesis exposcit Auctor assensum, vel supponit. Ubi olores Pontificiæ infallibilitatis postulant consensum posteriorem Ecclesiæ; dicit eum rejicere; quia cum Papa errante tota Ecclesia eodem inficeretur errore. Ergo ubi petit prævium Ecclesiæ specialis Romanæ assensum, necesse foret hunc eundem errorem imbibere. Et magis, quia hanc contendit esse conjudicem una simul pronunciantem latum errorem. Utrobique est par ratio, & evincit. Quod autem Ecclesia Romana sit consulens, & Judex cum Papa pronuncians, est paradoxum intollerabile jurisperitis incognitum. Si enim
con-

(a) In iter. def. pag. 125. & seq.

contingeret quidquam definitum iri defunctis Consiliariis, hoc iudicium audiet apud jurisperitos, ut iudicium vivorum, & mortuorum. Recolat scripsisse (a) de Papa definiente cum Cardinalium consilio, & assensu, quod *ipsamet sit Ecclesia Romana docens, iudicans, & pronuncians*.

Braterea hic devolvitur ecclesiastica, Monarchia in puram putam vesanam Aristocratiam, quam coram Eugenio IV, Episcopus Meldensis exprobrabat Basileensibus. Et verbotenus dicitur Petrus doctor, & magister, ac Pastor unice supremus totius ovilis Christi. Quid est Aristocratia, nisi multitudo Optimatum, singillatim consulentium, & simul perhibens Consultum, & sententiam ferens? Respondit vir (b) eruditus, Petrum Episcoporum Caput esse, & Pastorem; *quamquam sint illi simul, universalis Ecclesia docens, iudicans, ac de Fide pronuncians*. Sed errat. Episcopi in Concilio coacti se dicunt quidem repræsentare Ecclesiam universam, ut legere est in actis Constantiensibus, non autem se dicunt ipsam Ecclesiam,

uni-

(a) De Pont. Rom. Diss. 1. pag. 9.

(b) In iter. d. f. pag. 127.

universalem : aliter omnes magistri nullus discipulus. Ad rem nostram. Petrus cum Episcopis pronuncians, non ex necessitate, sed pro sua libertate, & indulgentia pronunciat, sicut pro libertate sua cogit Concilium. Quod & contingit in Supremo Monarcha absque dispendio Juris Monarchici. Sed ipse adversarius vult, & contendit, Ecclesiam Romanam repræsentatam per Clerum, vel Cardinales, ex necessitate absoluta, esse Judicem supremum controversiarum docentem, judicantem, & pronunciantem de Fide. Ecquid deficit puræ putæ Aristocratiae? Et quid Petro relinquatur, nisi vacuum nomen Capitis, Doctoris, & Pastoris? Mens primævis impleta præjudiciis vix emergit.

§. XXVI.

Radix controversiæ eruta.

PRO veritatis amore, quo quilibet sui compos flagrare tenetur, compellor aperire candide controversiæ præsentis radicem, ut perspicue eluceat, quantum opinatio adversarii Pontificiam infallibilitatem oppugnet, & quo ficulneo fundamento

mento sit innixa. Primus, qui hanc, sed leviter, quæstionem excitavit, fuit, ut aliquibus placet, Guido Carmelita in Concordia quatuor Evangelistarum, cui pro titulo præfixit *Quatuor unum*. Floruit hic Theologus illustris circa annum 1330. Clavum Ecclesiæ tenente Joanne XXII. cui Opus prædictum nuncupavit. Omnibus compertum est, quanta fuerit nequitia illius temporis ob famosa diffidia inter Bonifacium VIII. & Philippum Pulchrum Galliarum Regem, necnon inter ipsum Joannem XXII. & Ludovicum Bavarum; & quantum in discrimen ex partium contententium studio adducta fuerit Pontificis Romani auctoritas, & infallibilitatis privilegium, quia ab illa infesta perinde ac infauſta tempeſtate luctuoſum hoc de Pontifice certamen ſubiit, & adhuc ſubit Eccleſia, eſto pluribus, & iteratis ſpiculis pertinaces oſores percufferit, ac doctiſſimis elucubrationibus compreſſerit, reduxeritque ad incitas. Id conſtat vel lippis, ex mendaciis, ex falſatis auctoribus, ex truncatis auctoritatibus, ex diſſimulatis argumentis, ex digreſſione ad nugaria, & contumelias, quibus ſcatent eorum pagellæ,

læ; quin illos pudeat, utpote pudoris expertes, haberi, apud sapientes, impuros veteratores ad omnes ambagiosas fugitandi ludificationes paratos, ac expeditos; pertinaciam, quam colunt nunquam excussuros.

Scribente itaque Guidone (a) in hac rerum perturbatione, excidit calamo dictum illud: *Ubi Summus Pontifex cum Collegio Dominorum Cardinalium, sive cum generali Concilio congregantur in nomine Domini, & pro Fide ejus, ibi est ipse Christus, qui est veritas sine errore*. Novitatem assumpti odoratus, quoad convocationem Collegii Cardinalium, statim protestationem intexuit in hæc verba: (b) *Salva semper veritate, & determinatione Sedis Apostolicæ, ac Sanctæ Romanæ Ecclesiæ, cujus iudicio, & correctioni per omnia, & in omnibus me submitto, &, quod absit, si aliquid contra veritatem, aut Sedis Apostolicæ determinationem dicerem, ex nunc revoco, & pro non dicto haberi volo. Igitur præmissa prædicta protestatione, videtur mihi ad salvandam certitudinem, & infallibilitatem Fidei Christianæ*

(a) § Item.

(b) §. Unde.

stianæ, & stabilitatem auctoritatis Ecclesiæ, quod secunda pars, ad quam inducæ sunt ad oppositum rationes, sit vera; videlicet quod Dominus Papa, ad cujus auctoritatem pertinet determinare sententialiter, & declarare, quod ad Fidem pertinet, non possit cum Concilio Cardinalium errare.

Pluribus deinde argumentorum momentis evincit Guido infallibilitatem Summi Pontificis, nulla facta mentione de necessitate Concilii Cardinalium. Imo expresse docuit: *Ex quibus patet immutabilis, & invariabilis Ecclesiæ Catholicæ auctoritas, quæ post Christum in solo Summo Pontifice, & non in aliqua privata persona noscitur universaliter contineri.* Postea in (a) fine producti quæsitæ, adhuc formidine perturbatus præmissam repetit protestationem, dicens: *Hæc dicta sint sine temeraria assertionem, & salva veritate, & sub correctione Sedis Apostolicæ, & Ecclesiæ Romanæ, cui nunc & semper in omnibus dictis meis, & dicendis per omnia submitto.*

In tota hujus quæstionis serie, quam a versu 31. adoritur, nil aliud (b) probat Gui-

(a) §. Ulterius in fin.

(b) Pag. mihi 895.

Guido, nisi tria, nempe I. Ad Ecclesiam spectare determinationem Fidei. II. Statutis ab Ecclesia deberi assensum omnium Fidelium, quia errare non potest. III. Omnem auctoritatem Ecclesiæ esse in solo Pontifice. Sed de necessitate adhibendi Concilium Cardinalium nullam probationem affert, & ex repetitis protestationibus aperte gestit, id ex propria suggestione invecum fuisse. Sed unde probabilitatem haurire est in asserto nullo testimonio sacrarum litterarum, nulla auctoritate Patrum, nulla ratione fulto, vel colorato? Igitur, qua fluxit facilitate eloquium, & assertio, per sese diffuit, tanquam improbabilis privati Theologi suggestio. Minime defuisset Guidonis sapientiæ aliquod probationis genus, si quidquam validum excogitare potuisset.

Verum si penitus doctrina Guidonis introspectatur, non eo scrupulo fodicata erat mens, quasi Concilium Cardinalium exigeret necessario, loco Concilii generalis, ad determinandas res Fidei; sed quia dubius erat, an satis esset, pro auctoritate Ecclesiæ explicanda Collegium Cardinalium extra Concilium generale. Ex quo

H

hoc

hoc argumentum conficio . Si Guidoni non erat perspectum sufficere Collegium Cardinalium ad repræsentandam Ecclesiam statuentem de Fide , multo minus contentus fuisset , ut vocarentur Consulentes periti inferioris notæ . Igitur vel ipse tantum pro certo tenet , non posse Papam extra Concilium generale quidquam ad Fidem spectans decernere : vel plenam potestatem concedit Pontifici , extra quoque Cardinalium Concilium definiendi de Fide . Quum , ut vidimus , ipse agnoscat in solo Papa totam auctoritatem Ecclesiæ . Itaque exulat a sententia Guidonis novitia hæc necessitas absoluta Cardinales consulendi , & cujuscumque generis peritos .

§. XXVII.

Prosequitur præcedens argumentum .

SEculo posteriori , in altera malorum colluvie ob luctuosum schisma trium contententium Pontificum deinceps renovatum in conventu Basileensi , scripsit insignis Theologus , ac Canonista Joannes Cardinalis de Turrecremata *Summam Ecclesiæ* , ubi de potestate Papali tractatum .
in-

inferuit : Et explicans (a) qualis ea sit Apostolicæ Sedis sententia a Pontifice prolata de Fide tenenda, dicit eam esse, *quæ maturo, & gravi virorum sapientum, & maxime DD. Cardinalium Concilio primo digesta, & maturata sancitur*. Præcedentibus verbis scripserat, non eam esse, *quæ occulte, malitiose, aut inconsulte profertur*. Hanc labem certissime non incurrit Leo Magnus, neque incurrere poterat, quia Deus non est permissurus, ut tanta laboret nequitia Pontifex, vel negligentia, eo ipso, quod velit mittere Spiritum Sanctum assistentem, ac dirigentem Papæ iudicium de Fide promendum. Notandum tamen est, Purpuratum hunc nunquam adjecisse clausulam, unde educi possit necessitas absoluta alienæ consultationis, etsi asserat, quod *Summus Pontifex cum Cardinalium consilio, & assensu agit, disponit, atque gubernat universam Ecclesiam*. Ecquis est adeo hospes, ut Papa in singulis, etiam arduis, quæ suam non excedant potestatem, vel non involvant, cogatur semper consulentes adhibere, aut velit? Simulacrum hoc neque potuit

H 2

Pur-

(a) Libr. 2. cap. 92. ad 6. object.

Purpuratus de Turrecremata somniare.

Ad ulteriora : Magister Silvester Prieras (a) post integrum sæculum durius de hac re differuit . Videtur enim inferre velle , quod Papa , ut Papa agens , determinat cum consilio deputatorum . Sed adhuc nullam clausulam copulat , pro necessitate absoluta hujus agendi rationis . Hic cautus loquendi modus indicat omnino voluisse consulto abstinere a questione de possibili ; videlicet : an possit Papa etiam inconsultis peritis , ut Papa , determinare de Fide . Neque negotium facessit , quod hic agendi modus sit de jure divino , ut ait , quia supra abunde ex Cupers explicatum est , quam latissime recipiendum sit hoc jus divinum in presenti .

Sed omnem scrupulum , dubietatemque interpretationis sustulit egregius Theologus (b) Andreas Duvalius , qui adeo urget necessitatem peritorum consilii , ut illam turgentibus verbis circumscripserit , dicens : *Neque aliter , ut in confesso est apud omnes , ei (Papæ) assistit Spiritus Sanctus .* Acrioribus verbis extulit eandem necessi-

ta-

(a) Loc. supra cit.

(b) Traët. de supr. Pont. pot. p. 2. q. 3. ut supra. §.

tatem Magister Gravina scribens : *Quia Spiritus Sanctus hac lege ei (Papæ) assistit, si consultationes præmittantur, Nihilominus uterque (a) Doctor præclare, ac nitide excipit, ut jam superius verbis eorum relatis, demonstratum est; nimirum, quod Si doctus Pontifex per se se difficultates evolvere velit, poterit utique sine peritis consulentibus de rebus Fidei judicium ferre.*

Igitur neque Cardinalis de Turrecremata, neque Silvester Prieras, qui minus necessitatem alieni consilii urserunt, & quilibet alius Doctor eos sequutus, cogi possunt in necessitatem absolutam venire; esto vir eruditus dissimulatis verbis Gravinæ, & Duvalii, & indiscussa eorum integra doctrina sibi favere per vim omnem contendat. Sed jam noverunt sapientes, apud quos æqua laus, vel probrum,

§. XXVIII.

In idem argumentum.

NEglectis quibusdam ratiunculis objectis ab Edmundo Richerio, ut infallibilitati Pontificiæ obssisteret, jam plene a Duvalio dissipatis, ex quarum occasione recrudit in Galliis disputatio de necessitate consultationis præmittendæ ad iudicium Papæ de rebus Fidei & morum, tota hujus rei ruinosa moles extruitur super cap. *Apostolicæ*, & super cap. *Venerabilem*, ed quibus hic singulatim agendum est,

Canon *Apostolicæ* ex Regesto S. Gregorii deductus in hæc verba (a) se explicat, ut supra innuimus: *Apostolicæ Sedis sententia tanta semper Concilii moderatione concipitur, tanta patientia, & maturitate decoquitur, tantaque deliberationis gravitate profertur, ut nec immutari necessarium ducat, nisi forte sic prolata sit, ut retractari possit, vel immutari, si secundum tenorem præmissæ conditionis existat.* Ibi repetentes Doctores conjiciunt inferri, non esse fer-

ren-

(a) 25. q. 9. ibi Turrecism.

rendam sententiam *sub conditione* , semel ac definitiva sit , secus si sit interlocutoria , vel provisionalis . Verum ubinam in recitatis verbis cubat necessitas alieni consilii ? Nunquid in verbis illis : *Tanta semper Concilii moderatione concipitur* ? Sed ubinam legitur semper constitui ubique Iudices cum assidentibus Consiliariis ? Ubinam semper , & ubique adest plurium Magistratus ? Adest ne in Pagis , & Oppidis , imo in urbibus , ubi in pluribus unus præficitur Iudex , qui neminem consulit , nisi leges , & Doctorum libros ? Hæc igitur est consultatio petita a Canone , nec quid aliud exigitur ; ne cogamur sententias Judicum in Pagis existentium de nullitate excipere .

Et sane , ita intelligere necesse est . Eundemque Canonem sic intellexit Duvalius , ut etiam in definitionibus Fidei doctus Pontifex , veluti Gregorius , veluti Innocentius III. possit per se se Scripturas evolvere , Patres scrutari , Traditionem consulere , & perfectissime contemplari . Quid ad claram , expeditamque Duvalii declarationem , sententiamque excludentem necessitatem absolutam alieni consilii ,

respondet eruditus Auctor? Exclamat: *Quid clarius, quid disertius?* Utique contra opinionem, quam sectaris de necessitate absoluta exquirendi peritorum consilium, quia si licuit Leoni Magno, si licet Gregorio, vel Innocentio, evolat proculdubio necessitas absoluta, ut supra est demonstratum. Ergo Canon *Apostolicæ*, qui gestit gravitatem, & maturitatem consuetam Pontificum in definitivis sententiis, non cogit eos ad consulendum peritos, nisi prout a Deo directus fuerit, juxta datum judicium discretionis, adeo ut si per se valeat proprio labore, ac studio difficultates exsolvere, ut Magno Leoni contigit, possit etiam rem de Fide definire,

Objicit adversarius: *Si quid probat argumentum, illud, ut summe probat, Pontifices eruditione, & doctrina præstantes, Leonique simillimos, per se se, ac sine consultatione, alienaque consilio esse infallibiles, non item alios.* Sed errat, Qui alligat infallibilitatem cum peritorum consilio ex necessitate, & constituit Ecclesiam Romanam pronunciantem simul cum Papa, ille est, qui a peritorum sapientia, fere semper in

VQ-

voto discordi, infallibilitatem Pontificiam metitur, & expiscatur. Sed qui liberum dimittit Pontifici uti, vel non uti alieno consilio; & totius infallibilitatis pondus refundit in Dei donum, tum discretionis circa apparatus Judicii, cum ipsius Judicii deliberationis, ex adpromissa Spiritus Sancti assistentia directæ, & suavi providentiâ impulsæ; nequaquam sapientiæ, & eruditioni Pontificum indeficientiam Judicii, ut docemus, attribuit. Quemadmodum dono gratiæ respundet meriti principium, ne gloriemur in nobis,

§. XXIX.

De Cap. Venerabilem,

Alterum argumentum educitur ex cap. (a) *Venerabilem*, quod est Innocentii III. ad Vvillelmum Comitem Pessulanum. Ibi Pontifex ad vindicandam Sedis Apostolicæ, hoc est, Papæ pro tempore existentis, potestatem, docet ad ejus judicium causas referendas esse, sententiamque expectandam, cui omnino standum, sit, Producit Textum ex Deuter. cap. 17. quo

(a) Tit. Qui fil. sunt legit.

quo Deus populo præcepit : *Ascende ad locum , quem elegerit Dominus Deus tuus . . . Veniesque ad Sacerdotes Levitici generis , & ad Judicem , qui fuerit illo tempore . . . Qui autem superbierit , nolens obedire Sacerdotis imperio , qui eo tempore ministrat Domino Deo tuo , & decreto Judicis , morietur homo ille .*

Explicat deinde Textum Innocentius dicens : *Locus , quem elegit Dominus , Apostolica Sedes esse cognoscitur , idest Petrus ex Christi mandato Romæ Sedem fundans . Sunt autem Sacerdotes Levitici generis fratres nostri ;* inquit Innocentius . *Hos esse Cardinales aliqui (a) interpretantur . Alii esse Episcopos censent , quia tempore Innocentii III. adhuc delitescibat dignitas Cardinalitia , tot privilegiis destituta .*

Scitu dignum est , quid in Judiciorum Reipublicæ Hebræorum instituto legitur , quod ex (b) Sigonio delibare placet . Institutus a Deo Moyse Dux populi sui solus obibat munus Judicis , adeo ut consultus ab Jetro , ut tantum laborem sibi parceret , inter viros sapientes illud idem

mu-

(a) Gonzalez in dist. cap.

(b) Sigon. de Republ. Hæbr. l. 6. c. 6.

munus distribuerit, reservata sibi tantum graviorum rerum cognitione. Successive jussu Dei septuaginta Seniores delecti fuere, qui per civitates distribuebantur judicia finituri, ea lege, ut si lites exsolvere ignorarent, eas ad Synedrium referrent. Tempore Judicum supremorum & ipsi soli judicia expediebant, quamobrem (a) de Debora, & Samuele legitur, quod circuibant per loca judicantes (b) Israelem. Ergo soli absque consiliariis, vel assidentibus. In Senatu autem Levitici generis aliud erat judicium Levitarum, & aliud Pontificis, qui per annum deligebatur ingressurus sancta penetralia, ibique Domino ministraturus. Ad illos pertinebant causæ minores, ad hunc majores causæ reservabantur, pro quibus si opus erat, Rationale consulebat, in quo (c) doctrina, & veritas emicabat. Seniores autem Levitici generis non uno loco erant judicaturi; sed alii sedebant in porta, alii in atrio, alii Senatum conficiebant, faciliora successive, tum difficiliora judicantes, per re-

(a) Sigon. libr. 7. c. 2.

(b) Judic. c. 4. & Reg. 1. 7.

(c) Sigon. l. 5. c. 2.

remissionem unius ad alterum Tribunal ;

Adde Textum Eccl. 45. 21. de Aarone dicentem : *Ded' illi in præceptis potestatem , in testamentis judiciorum docere testimonia , & in lege sua dare legem Israel.* Ubi Lyranus explicat : *Ad declaranda dubia , referebantur ad summum Sacerdotem , ut sententia sua infallibiliter teneretur* 17. Deut. Ibiq. concordat Ugo Cardinalis.

His explicatis , labitur utrinque elumbe argumentum , ob minime discussas Scripturas , objectum . Igitur jussit per Moysen Deus populo , ut veniret ad destinata , Tribunalia gradatim pro qualitate causarum , intellecta particula & disjunctive , alias etiam Judex , supremus dux , debuisset simul convenire , quod , ut vidimus , repugnat Scripturis . Quod si difficillimum occurrerit , vadat populus ad Pontificem illius anni , & ne declinet a sententia , quam audierit . Ita , inquit Innocentius , venies Romam , ubi in diversis Tribunalibus fedent judicaturi Cardinales fratres mei . Ubi autem petitio suberit , vel quæstio de Majoribus , puta de privilegiis , de dispensationibus , de interpretatione (a) Scrip-

(a) Gonzalez loc. cit.

turatum ; de Fidei , & mbrum controver-
fiis , ad Petrum venies expectaturus judi-
cium , a quo nefas fit resilire : quia hic
assistentem habet Spiritum Sanctum , &
dono discretionis , atque infallibilitatis
est munitus , quemadmodum Pontifex ve-
teris Testamenti inspiciendo Rationale
doctrinam & veritatem promendam do-
cebat .

Quid extundant ex hoc cap. *Venera-
bilem* , pro necessitate absoluta peritorum
consilii , nullus conjicio , quia nullibi in
neutro Textu nec verbum legitur . Potuit
in lege veteri Judex pro arbitrio consulere ,
vel per se se judicare , ut vidimus . Potuit &
ipse annuialis Pontifex , quum Textus suf-
frageretur ; eccur id denegandum Petro , qui
meliori fungitur Sacerdotio , & altiori pri-
vilegio a Christo est donatus ? Qui plura
desiderat , adeat Magistrum Capponi a
Porrecta , qui in *altreis veritatibus super
Leviticum ; & Deuteronomium* docte , ac
perspicue impugnat adversariorum opina-
tionem de necessitate absoluta alienæ con-
sultationis in judicio infallibili Papæ :

§. XXX.

*De paritate Capitis utentis membris
Corporis.*

A Naturalibus ad moralia procedit præfens objectio . Sicut , inquit , Caput naturale perneceffe habet uti cæteris membris ad obeunda Corporis , & fui officia ; ita Caput morale , cujufmodi eft Papa debet uti membris fuis , puta Cardinalibus , vel peritis , qui vel actu , vel habitu fint Cardinales , ad obeunda officia propria Capitis in favorem totius corporis Ecclefie .

Hæc fumma argumenti , quod mille pedibus claudicat . Age . Quid nomine Capitis naturalis venit ? Certe Caput fuis partibus integrum , ficut de manu , ficut de pede , alias truncus fimillimus Hermæ impotens ad fuum officium erit , ficut & de manu digitis orbata eft dicendum . Sed Caput naturale plura facit per fe fe absque neceffitate utendi alienis a fe membris ; igitur & poterit Caput morale , absque ufu Cardinalium , vel peritorum . Præterea ; principale , quod eft in Capite naturali ,

rali, est mens dirigens, determinans, atque definiens; sed hæc præstantur absque membris externis: igitur, & in Capite morali, quod in mente sua poterit rem Fidei definire infallibili judicio se ipsam obligante ad assensum; esto ad aliorum obligationem etiam pronuntiatio requiratur. Est enim supremus Judex, nemini subjectus, maxime in Fidei judicio. Itaque ineptissima est paritas ad intentum necessitatis absolutæ alieni consilii.

Ad hæc. Etsi frequenter similia ad naturalia metiamur Moralia, nunquam paria evadunt, quia in Moraliis adest semper major ampliatio. Exempla dedimus ex sacris (a) literis. Dux populi Dei erat insimul Judex, & tamen persæpe judicabat absque consilio, ut de Debora, & Samuele legitur; & de Salomone alibi diximus, & constat ex Scripturis. Itaque quoque legimus de annuali Pontifice antiquatæ legis, cui incumbabant judicia altissimæ doctrinæ, & veritatis. Et deterioris conditionis erit a nobis censendus Pontifex Maximus legis Christi adeo excellen-

(a) §. præced.

lentioris gratiæ , & privilegiorum abundantia ditatæ , & ditantis ?

Adde . Quod Cardinales sint membra Papæ passim legitur apud Jurisperitos , & apud Theologos . Sed quod simplices periti , non mitrati , neque Galerati sint membra Papæ , quia sunt Cardinales re , & actu , esto non nomine , vel habitu , nullus id dixit , aut somniavit . Ecquis colliget ex paritate Capitis , quod Papa ex necessitate utens , ut Caput , suis membris , liberum habeat uti peritis non Cardinalibus , qui nullatenus habentur , ut membra illi adhærentia ? Sane paritas tot morbis laborat , ut pudeat illam amplius refricare . Quod argumento est , ut insignis Theologus , & Canonista Silvester Prieras eam urgens , nunquam intenderit exinde deducere necessitatem absolutam alienæ consultationis in Papa definiente ex Cathedra , sed condecenciam , & convenientiam , ad melius esse dumtaxat perspexerit inferre . Decipiuntur quippe adversarii in eo , quod agente Petro *ex humilitate* , cum communi omnium voluntate , itaut nihil ageret *principaliter* , aut *dominative* , ut ait Chrysostomus *super act. Apost.* cogitant ,
non

non habuisse per se liberam auctoritatem agendi, & definiendi, quod falsum est, ut ex ipso Chrysostomo observavit Cardinalis de Turrecremata libr. 3. cap. 24. parum ab initio.

§. XXXI.

Corollarium præsentis Dissertationis :

TOtus disceptationis conatus cum adversariis in contraria collimat. Pontificii Theologi vindicant absolutam infalibilitatem Papæ in definitionibus Fidei & morum universæ Ecclesiæ propositis, innixi verbis absolutis Christi Petro dicentis : *Pasce oves meas : Pasce agnos meos :* & alibi : *Confirma fratres tuos*, ubi nihil de conditione, vel medio extraneo quidquam innuitur. Ita intellexit Antiquitas, ut semper Patribus, & perpetuæ Traditioni ignotum fuerit additamentum, quod post dissidia, & schismata ad circumscribendum, & callide circumcidendum hoc privilegium, unice a Christo datum, osiores Pontificiæ auctoritatis novissime excogitarunt. Ex quo fit, ut apud Pontificios Doctores sit irrefragabilis hæc propositio absoluta :

I

Pa-

Papa docens in rebus Fidei & morum totam Ecclesiam, est infallibilis.

Ofores Pontificiæ auctoritatis inutili conatu per cuniculos moliri sunt assertum inficere, & dejicere, ut alteram contrariam propositionem cate inducerent, nempe: *Papa docens in rebus Fidei & morum totam Ecclesiam, est fallibilis.* Ita protulit Alphonsus de Castro; ita Auctor opusculi *de Pontifice Romano fallere & falli nescio*, suo stigmate notati. Quidquid enim additur, quod ignoravit antiquitas, quod traditio Patrum non adjunxit, nunquam infringit absolutum de Papali infallibilitate assertum, sed variat, ut notum est Philosophis. Do exemplum, quod suppeditat vir eruditus, sed minime ad rem suam, ut perperam censuit. Hæc propositio: *Prædestinatus erit salvus*: est assertio æternæ veritatis. Siquis adjiciat conditionem per modum contingentis, nempe: *Si perseveraverit, erit salvus, si non perseveraverit, non erit salvus*, ecce resoluta propositio in falsum, & impossibile ex adjecto assertum; nimirum: *Prædestinatus non perseverans non erit salvus*. Ratio omnium est, quia ly *prædestinatus* includit certissimum de-

decretum salutis consequendæ , & simul decretum dandi donum finalis perseverantiæ . Aliæ vero propositiones , quæ non causam , sed effectum prædestinationis explicant , possunt esse simul veræ , uti istæ sunt : *Qui perseverat usque in finem , salvus erit : Qui non perseverat usque in finem , non erit salvus* ; quia utraque præscindit a decreto intentivo prædestinationis .

Tunc sic . Hæc propositio : *Papa docet totam Ecclesiam* ; involuit necessario assistentiam Spiritus Sancti , & in hac donum consilii , & discretionis , a quibus infallibilitas fluit & docentis & doctrinæ , ideoque si quid contingens , ut necessarium adjungatur , inferri necesse est hanc impossibilem assertionem : *Papa directus a Spiritu Sancto fallere & falli potest* . Ut quid igitur osiores Pontificiæ infallibilitatis illigant consilio peritorum indeficientiam Papæ , nisi ut illam evertant per absolutam enunciationem : *Papa docens universam Ecclesiam est fallibilis* ?

Inquit vir eruditus conditionem de adhibendo consilio alieno subintelligi in dictis Evangelicis , sicut Intentio ex parte ministri subintelligitur in data potestate

conficiendi Sacramenta . Sed est dissimile exemplum . Tum quia Hieremiæ cap. 48. 10. legitur : *Maledictus , qui facit opus Dei fraudulenter ;* vel , ut vertit Chaldæus *negligenter* : Tum quia id habetur statutum in Concilio Florentino pro Armenis : tum quia est conditio ex parte causæ , ut actio sit humana , & non præcise hominis , quæ potest brutis assimilari . Ex quibus omnibus si concedimus debere Pontificem vel per se , vel per peritos rem definiendam examinare , ac discutere cum Scripturis , & Traditione , donec veritas constet , quid ultra imponitur necessitas absoluta , quam Patres Ecclesiæ non imposuerunt , neque imponere cogitarunt ? Sed candide loquar . Nimis urit Pontificis oſores infallibilitas Papæ . Nimis angit Itala constantia : Et quia superare diffidunt , ad figmenta , & ad calumniam objectæ adulationis erga Sedem Apostolicam refugiunt . O miserum effugium !

§. XXXII.

De facto Dogmatico.

AD alterum quæstionis Caput transit eruditus Auctor : loquuturus nempe de iudicio infallibili super Facto Dogmatico, illud a Pontifice Maximo abjudicans. In vindictis, quas adornat, pro auctore (a) opusculi *De Romano Pontifice fallere & falli nescio*, ad quæstionem, de qua agitur, plura silentio premit, & unum tantum depromit. Omnia recitabo integre, ut duo discantur, Primum in re momentosa, uti res sunt Fidei, neque ambiguitate, neque æquivocatione utendum est. Alterum est, ut perspiciat, Argos, non Aristarchos compellandos esse quos, Censores senferit,

Laudatus (a) Auctor pluries de facto dogmatico verba fecit. Primo, quum Zosimum PP. purgat a calumnia ei objectâ, perinde ad si puros erroris Pelagium, & Cœlestium dixerit; aitque: *Constat nihil-
oscius, totum id fecisse Zosimum errore fa-*

I 3

Eli

(a) §. 9. pag. 54. & in iter. def. art. 9. pag. 133.

(b) De Pont. fall. & falli nescio Dissert. I. cap. X. pag. 61.

*ēli, non juris, hæresiarcharum artibus circumventum. II. De Vigilio (a) PP. in causa trium Capitulorum erroris insimulato differens, inquit: Obvia responsio est, errorem (Vigilii) facti dogmatici illum fuisse, non juris, seu dogmatis, atque doctrinæ. Et iterum ait: (b) Quapropter, qui in priori de illis judicio contigit error, facti, quod, ajunt, dogmatici fuit, non juris seu dogmatis, atque doctrinæ. III. De Honorio I. PP. (c) agens refert nonnullorum eruditorum responsionem dicentium, sextæ Synodi Patres ex errore facti dogmatici censuisse Honorium vere Monothelitam, & subdit: In quem facti errorem Concilia etiam æcumenica incidere posse nemo nescit. IV. In fine (d) dissertationis I. ad exitum perductæ legitur monitum lectori, ubi declarat Auctor prælaudatus, *Vigilium in eo dumtaxat errore (facti) fuisse antequam trium Capitulorum sensum diligentius, & maturius expendisset; nequaquam vero postquam diligenter expendit. Hac data occasione vehementer contestatus est, & profitetur alienum**

(a) Loc. cit. pag. 66.

(b) Et pag. 97.

(c) Pag. 70. cit. opusc.

(d) Pag. 132. cit. opusc.

num omnino esse ab eorum sensu , qui blaterant Innocentium X. , & Alexandrum VII. errore facti laborasse in facto dogmatico Jansenii.

Bene sit. Sed allata repetita assertio , an per monitum sufficienter elidatur lectori dijudicandum dimitto. Nunc (a) eruditus Auctor sui oblitus admississe non semel , sed iterum & iterum errorem facti dogmatici , tum in Pontifice , cum in Conciliis generalibus , & fucatam protestationem offundens , disputandi gratia , ut ait , affirmativam sententiam complectitur , propugnaturus posse Papam in facto dogmatico aberrare. Primam aleam jactat ex auctoritate insignium Cardinalium *a Turrecrematae , Bellarmini , Laureæ , Pallavicini , & Aguirrii* , qui de industria , & data opera docuerunt , non modo Romanos Pontifices , sed & ipsa Concilia æcumenica in errorem facti dogmatici & incidere posse , & incidisse re ipsa. Hæc vir eruditus .

Non inficior , quosdam Theologos in facti dogmatici examine non nunquam hallucinationes passos esse , vel confundendo factum simplex cum facto mixto cum ju-

(a) Pag. 55. n. 2. & seq. & in iter. def. pag. 134.

re , vel incaute jus a facto dividendo , quum utrumque sit connexum ; ut nequeat unum damnari , & alterum eodem judicio probari . Quod fortasse contigit , quia , nondum emerferat facti Janseniani discussio momentosa ad depellendam distinctionem juris & facti , qua male feriat homines eludere conabantur erroris proscriptionem , nova adhibita responsione , *obedientia juri , reverentia facto* . Neque gravabor permittere , adfuisse etiam Scriptores minus caute loquutos post facti Janseniani dissidium , quos tamen Apostolica Sedes , quantum in se est , vel corripuit , vel aperte proscripsit , ut cæteri edocerentur ad veritatis studium comparandum , & aliquandam melioribus curis inductam disputationem .

Sane Constitutio *Vineam Domini* edita a Clemente XI. (quam auctor cate dissimulat) tota in eum scopum collimat , ut rebelles lumini distinguentes factum a jure in facto dogmatico , illi prætexentes obedientiam , huic obsequiosum silentium , sed verius in neutrum captivantes intellectum , aut utrumque illudentes , districte confodiat . Ex quo , quum quodlibet factum

ctum dogmaticum ejusdem sit generis , ut plane constat , futile est illud Jansenii excipere , dum quis errorem super alio facto dogmatico in Concilio , vel in Pontifice comminiscitur . Nihil ergo fidendum esse existimet auctoritati etiam insignis Theologi , quum Papa refragatur , Proloquium enim (a) Divi Thomæ est , magis standum esse auctoritati Pontificis , quam Hieronymi , sive Augustini . Puto adulationis vitium non esse Angelico Doctori exprobrandum . Sed quid ambigimus ? Ipse Auctor , effuso furo *de disputandi gratia* , non veretur etiam factum Jansenianum in quæstionem introducere , perinde ac si hæc eliquata per plures Pontificias Constitutiones non fuerit .

Quid factum dogmaticum explicet , & includat , contendit Auctor suam præferendam esse descriptionem . (b) Sit itaque : *Gratiæ interiori nunquam resisti* , error juris est ; hunc errorem docuisse Jansenium , & tenuisse in suo edito libro , factum est . Adde , si placet , aliud exemplum . Propositio : *Pater major me est* , est ver-

(i) 2. 2. quest. 1. art. 11.

(b) In iter. def. pag. 139.

verbum Christi, quod est juris, interpretatio Arii, & interpretatio Sanctorum Patrum sunt quid facti. Expendit utramque Concilium Nicænum. Peto an istud errare potuerit, quia in hujusmodi attributionis examine, ut ipse Auctor ait: (a) *Prudenti in primis ponderatione potestatis, significationisque verborum omnium... Tum Criticæ artis, & Grammaticæ legibus*, quæ fallere possunt, utendum est. Si Auctor annuit; en pessundata auctoritas Ecclesiæ in interpretatione Scripturarum, Traditionisque excolendæ conamine. En victor Arius; en Fides labefactata, & undique in incertum vagans, Si negat; en factum dogmaticum sub infallibili judicio Ecclesiæ, non obstantibus Criticæ, & Grammaticæ legibus, quibus interpretatio Scripturarum, & Patrum librorum subest. Hoc indeficientiæ jure Pontifex, vel Concilium definit, ac discernit libros Canonicos a non Canonicis: Sacræ Scripturæ sensum verum a falso, doctrinam Patrum certam; obviumque sensum Auctorum ab incerto: nec non a libro Jansenii, quemadmodum a scriptis Arii juxta auctorum sensum ex-

cer-

(a) Pag. 59. & in iter. def. pag. 140.

cerpit errores, & hæreses, quibus scatebant. Quæ si in ancipiti, aut dubia veritate relinquerentur, væ, exclamare cogemur, & Ecclesiæ, & Fidei firmitati, quia absque regula certa impune unusquisque posset in oppositam abire sententiam, liberumque fieret hæreticis a condemnatione passa resilire per interminabiles quæstiones, ac distinctiones, ut perspecte docebat Clemens XI. (a) Ecce non amplius Arii hæresis Ariana; non amplius Jansenii hæresis Janseniana, sed purum figmentum, & spectrum vel pueris formidandum, ut plerique blatiunt.

Si ita est, arguit (b) Auctor, recte sexta Synodus censuit Honorium ut hæreticum, ex sensu perspecto in ejus epistola ad Sergium. Fateor; si ut hæreticum illum Synodus damnaasset. Sed quia tantum eum proscripsit ob improvidam œconomiam, ob quam erumpentem hæresin, statim non extinxit, ut advertit (c) Leo II. ideo nullum errorem admisit sexta Synodus in facto dogmatico super epistola Honorii.

Ad

(a) In cit. Const. Vineam Dom.

(b) Pag. 51. & seq. & in iter. def. pag. 140.

(c) Epist. 1. ad Episc. Hisp.

Adhuc urget (a) Auctor: quid dicendum est de factis dogmaticis, nimirum Origenis, Marcelli Ancyran, Theodori Mopsuesteni, Theodoret Cyrensis, Ibæ Edesseni, Honorii PP., Procli Patriarchæ Constantinopolitani, Maxentii Archimandritæ, Cœlestii Monachi, Joachimi Abbatis, Juliani Pomerii Antistitis Toletani, Joannis Pici Mirandulani, quorum scripta, vel primo damnata fuerunt, & postmodum dimissa absque censura; vel primo probata sunt, & deinde anathemati subjecta? Proculdubio hic inconstans agendi modus irreptum errorem facti in Pontificum Conciliorumque judiciis arguit.

Mirandum mihi est, argumentum toties elisum, semper vetustate caducum, nunquam aliqua novitatis specie linitum, iterum irruere ad fucum faciendum. *Natalis* abunde regulam tradit respondendi ad hujusmodi objectiones, indeficientiam judicii in Papa, & Conciliis super facto Dogmatico (b) agnoscens, & evincens.

I. Ali-

(a) Pag. 56. & in iter. def. pag. 136.

(b) Hist. Eccl. ad sæc. V. Dissert. 14. qd ob. 2. & ad sæc. 6. Lib. 5. ad ob in 3. p.

I. Aliquando contigit rejici unam propositionem ut æquivocam, in uno sensu hæresi consonam, in altero a pravitate distantem. Ut accidit in propositione: *Unus de Trinitate passus est carne*, quam explodit Hormisdas, & probavit Joannes II. spectata discrepantia sensus. **II.** Quandoque occurrit hæreticas dici propositiones, vel secus non dici, ante finale earundem judicium. Ut in Origene damnatam scripsit (a) Leo Magnus animarum creationem, priusquam corporibus inferantur, ante plenam Origenis condemnationem in quinta Synodo peactam. **III.** Contingit errores nonnunquam ex temporum circumstantiis dissimulatos fuisse dispensationis ergo, unde vulgum causæ, & dilationis ignorantem opinio incescit, desuisse erroris turpitudinem. **IV.** Non semel occurrit Theologorum imprudentia, qui ex acri ingenii impetu apologias texere ausi sunt, contententes etiam damnatos errores, vel auctores vindicare ab iniustis censuris, & ab anathemate lato eripere. Ut palam est de iis, qui Origenem defendere agressi sunt.

His minime perspectis sæpe refricatur

(a) Epist. XI. ad Julian. Ep. Cœn.

tur tum a piis, cum ab impiis Scriptoribus idem argumentum in perniciem inefficientiæ, qua pollet Ecclesia, ut placet (a) Forbesio Heterodoxo. Igitur breviter dico, Origenem jure fuisse damnatum, & inique vindicatum.

Marcellus Ancyranus plura perpeffus est ob suspicionem hæresis tum Arii, quum Sabellii, nunquam tamen convictus hæreticus, aut peremptorie damnatus fuit.

Theodori Mopsuesteni causa in quinta Synodo plene finita fuit. Antea in disceptatione hæsit. Si quis deinceps pro eodem blateravit, sapere cum Nestorio est habitus.

Theodoretus Cyrensis ex œconomia prudenti in patientia toleratus fuit, quo ad caput scriptorum, ut Nestorio diceret Anathema. Sed postea in quinta Synodo scripta exagitata, damnata decretorie fuerunt.

Quoad Ibam Edessenum, quando ventilata fuit ejus Epistola serio examine, scripta fuit inter tria Capitula. Quæ præcesserunt nihil ad rem nostram conferunt.

De Honorio Romano Pontifice jam supra satis est dictum.

Nota

(a) Libr. 3. Instruct. historico Theol. c. 22.

Nota in Proclum Constantinopolitanum, ac si faveret contorto sensui propositionis Scytharum Monachorum ad Hormisdam delatæ, fuit suspicionis, non definitivi decreti. A Concilio Chalcedonenſi depulſa eſt. Quid ad nos?

Vindiciæ pro Joachimo Abbate imprudenter ab arbitrio hominum invectæ non evacuant latam cenſuram Lateranenſis Concilii adhuc vigentem.

Julianus Pomerius, non Archipræſul Toletanus, ut vocat Auctor, ſed Eccleſiæ Monafterii S. Michaelis Abbas, ut conſtat ex ſubſcriptione Concilii XI. Toletani apud Aguirre, in ſuſpicionem venit ob propoſitionem æquivocam, quæ videbatur propendere in hæreſim, poſtea ab Elipando eructatam. Expoſtulat ſus apud Pontificem, egregie, & catholice eam explicavit, & ſuſpicio incunctanter ſublata fuit. In eandem ſuſpicionem apud Patres Concilii Francofordienſis adducti fuerunt S. Ildephonſus, & S. Julianus Præſul Toletanus per fraudem ejusdem Elipandi quærentis ſuæ ſectæ præſidium ab hujusmodi jamdiu deſunctis viris ſanctitate & doctrina conſpiciſ. Sed ſtatim reſolutis iſtorum libris
 fraus

fraus detecta est , & auctores insontes probati sunt .

Opera Pici Mirandulani indiscreti homines conati sunt a censuris abstergere , & proscriptionem eludere . Laterem lavarunt , & proscriptio est in viridi observantia .

Quid proposito argumento ; quid conglobatis exemplis nude recitatis , absque ratiocinii pondere , ex quo illucescat Auctoris intentum , quid difficultatis ad rem nostram objiciat , nullus conjicio . Abunde erat unum proferre , quo ostenderetur aut Pontificem , aut Concilium priorem retractasse finalem sententiam super facto dogmatico per errorem latam . Hoc est momentum quæstionis . Nequidquamprehendit , ergo causa cadit .

§. XXXIII.

Iterum de Facto dogmatico :

ARguit eruditus (a) Auctor , quod data adhuc possibilitate erroris in Pontifice , & Concilio definiente super facto dogmatico , non proinde sequitur , erravisse Innocentium X. & Alexandrum VII. in

(a) Pag. 57. §. 2. 3. primi opusculi. Anon.

in iudicio lato super facto Janseniano, quia satis non est ostendere potuisse eos errare, nisi & illos re ipsa falsos esse probe-
tur. Sed longe opinione fallitur, & for-
tasse fallitur, quia neque Clementinam
Constitutionem *Vineam Domini* commemo-
rare voluit. Si in facto dogmatico Pontifex
errare potest, nullus ex debito Fidei ad-
stringetur captivare intellectum in obse-
quium, quia fallibili iudicio, esto aliquan-
do veritatem aperiat, nullum debetur Fi-
dei obsequium, nisi per accidens, ratione
iudicii obligantis. Quapropter Theologo
decidenti quæstionem de Fide non credi-
mus ex Fide divina, neque ut regulam Fi-
dei vivam agnoscimus, sed ut non falsum
probamus. De interpretatione Scripturarum,
& de traditione Patrum eadem difficultas
urget. Factum dogmaticum & istud est.
At satisne est accipere iudicium Pontificis,
vel Concilii, quia non falsi iudices sunt?
Si ita est, evolare necesse est unum ca-
put Fidei nostræ, nempe infallibilitatem
sensus Sacræ Scripturæ, & doctrinam Pa-
trum, ex infallibilitate Judicis, juxta illud
Augustini: *Non crederem Evangelio, nisi me
doceret Ecclesia.*

Audio Auctorem (a) dicentem : Ecclesia infallibilis est, quia Scripturæ, & Traditionis habet plenissimam intelligentiam . At in attribuendo sensum libri auctori suo, v. g. Jansenio, non item . Hæc, bona venia, est petitio principii . En urgens argumentum . In attributione erroris obvio sensui Jansenii intercedit fallibilitas Judicis, inquit eruditus auctor, quia hoc est de facto dogmatico . Igitur etiam in attributione sensus Scripturæ Sacræ Spiritui Sancto, vel sensus doctrinæ Patrum, Augustino, Hieronymo, & aliis, erit Ecclesia fallibilis judicii, quia pariter & hæc fuit facta dogmatica, Unde ergo habebitur Criterium pro certa interpretatione Sacræ Scripturæ, & Traditionis, si de medio tollitur infallibile judicium Ecclesiæ in facto dogmatico ?

Ad hæc; sub aspectum subjiciam verba Clementis XI. in laudata (b) Constitutione *Vineam Domini*, dicentis, & *quinque illas propositiones ex libro præmemorati Cornelii Jansenii Episcopi Ipresensis ... excerptas, ac in sensu ab eodem Cornelio Jansenio intento damnatas fuisse, declaramus, & definimus*. Si Pontificia definitio adhuc non captivat intellectum in
ob-

(a) Pag. 59. ante med. (b) §. 9.

obsequium Fidei , sed dumtaxat non falsos fuisse Pontifices in facto Janseniano ostendit , ecce datum hominibus nunquam Ecclesiæ contradicendi finem facere , ut prosequitur Clemens ; (a) *qui variis distinctionibus , seu potius effugiis ad circumventionem erroris excogitatis , Ecclesiam ipsam turbare , eamque interminatis quæstionibus ... implicare conantur* . Et demum mandat , ut eliminatis assertionibus , ac distinctionibus pravitatem , & errorem palliantibus , ore , & corde quilibet fidelis teneatur propositiones una cum sensu , & in sensu Auctoris in illis expresso damnare , ut hæreticas , & ut hæreticum sensum illarum rejicere debeat . Futilis itaque est altera erumpens distinctio , nempe ad supplendum fallibilis iudicii defectum , sufficere , non posse Judicem falsum probari . Nonne hic modus loquendi retorquet certitudinem definitionis in experimentalem inquisitionem , & collationem iudicii cum re definita ? Nonne illuditur dogmaticæ Constitutioni , etiam si placet Gal-
lis , ab universa Ecclesiâ acceptatæ ?

Præterea do exemplum . Ecclesia Latina docet , & tenet , Spiritum Sanctum a

K 2

Pa-

(a) §. 21.

Patre, Filioque procedere. Id ostendit ex Patrum traditione in Concilio Florentino. Ecclesia Græca (ut sibi blanditur) ex eadem traditione Filium ab activa spiratione arceat. In citato Concilio utraque pars doctrinam Patrum expendit. Peto, an discussionis diversitatem licuit referre ad non repertam falsitatem in dictis Patrum, an ad infallibile judicium Ecclesiæ in facto dogmatico, nempe in excussa doctrina, & sensu Patrum? Si primum, ut contendit Auctor, en definitio Processionis Spiritus Sancti a Patre & Filio certa quidem certitudine humana, neutiquam Fidei. Si secundum: ergo censenda est Ecclesia infallibilis judicii super facto dogmatico. Et quidem ne dam in facto dogmatico traditionis ex doctrina Patrum, & sensus, sed etiam in quolibet alio æque ac in facto Janseniano, quod gratis excipiebat Auctor, sed deinde & illud comprehendit. Utrobique enim agitur de judicio attributivo doctrinæ vel Patribus, si est pro Fide, vel hæreticis, si sit contra Fidem. Erit, audio, & est infallibilis in jure, sed non in facto eidem connexo. Respondeo, hanc quoque distinctionem damnare Clementem XI. in

laur

laudata Constitutione , & recte . Traditio doctrinæ Patrum quid significat ? Nisi Patres in suis libris hanc , vel illam doctrinam in sensu proprio explicatam , expressam , traditam relinquiſſe , sensumque auctorum in ea impressum agnosci ? Si factum a jure distinguitur , & dividitur ; en doctrina sine Auctore , en traditio sine teste , en jus sine auctoritate . Et hæc est illa Traditio , quæ est unum ex principiis firmitatis nostræ Fidei ? Et hæc est traditio Patrum ? Et hæc est unum ex præcipuis fundamentis , a quo derivat , & oritur Fidei definitio ? Doctrina infallibilis , sensus vero & Auctoris & libri sub principio fallibili ? Quid aliud ad evertendam traditionem aptius excogitare possunt hæretici ?

Ut aliquando hujus generis orationem concludam , liberius dicam , neminem absque gravi censura posse abjudicare a Pontifice , vel Concilio legitime congregato infallibilitatem judicii lati super facto dogmatico : distinctiunculas pravitatem foventes esse illas , quas adhibent indisciplinati homines ad declinandas definitiones Fidei , & esse prorsus tergiversationes fri-

volas ad favendum hæresi, & hæreticis excogitatas, adeoque jure fuisse, & esse damnatas, elisas, penitusque exinanitas per Constitutionem *Vineam Domini*; nec non auctoritati Pontificiæ illudere, qui eas refodere audet, sive ut factum Jansenianum refricare moliat, sive ut quodlibet aliud factum dogmaticum tenter a jure secernere, & a definitivo judicio callide eripere conetur; & demum hujuscemodi conatus summum Fidei Ecclesiæque præsidium, nempe interpretationem Scripturarum, ac Patrum traditionem ab eadem Ecclesia eliminare, atque evertere, semel dato, quod admittatur fallibilitas super facto dogmatico, Ubi autem incaute nonnulli Scriptores in contrariam opinionem deflexerint, incomperta veritate, vel minus exacte perpensa ante Constitutionem *Vineam Domini*, defectum humanum passi sunt.

§. XXXIII.

In idem argumentum .

Postremo in sui patrocinium quærit eruditus (a) Auctor quotquot in agitandis quæstionibus de infallibilitate Romani Pontificis, ejusdemque supra Concilia œcumenica auctoritate operam impenderunt, quia uno calculo definierunt, has quæstiones ad Fidem non pertinere. Ad hujus rei argumentum affert testimonium Ven: Innocentii XI., qui anno 1679. dato Brevis epistolari ad Episcopum Benignum Bossuet, plurimum probavit, ac laudibus exornavit adornatum Opusculum adversus Calvinianam procacitatem, esto expresse idem clarissimus Bossuet declaraverit in dictas quæstiones noluisse calamum implicare; *Quum ad Fidem Catholicam non pertineant*. In eodem sensu differentes quosdam proceres Curia Romanæ solerter advocat, & producit.

Sed inutili incumbit labori; quia ultro datur, hucusque de hujusmodi quæstionibus judicium definitivum desiderari.

K 4

At-

(a) Pag. 61. in med. & in iter. def. art. ult. pag. 144.

Attamen Apostolica Sedes omnino culpandos esse censeret, qui ea privilegia Romano Pontifici detrahunt, & tum censurarum spiculis eos aggreditur, cum proscriptione librorum coerces, atque castigat. Neque laude honestasset Innocentius Benignum. Bossuetum, si minus digne, ac minus integre de Romani Pontificis privilegiis fuisset loquutus, Cæterum de censuris iniustis alibi constat,

Nunc ad minus subijciam cauterium injectum ab eximio Theologo Amat de Graveillon Doctore Sorbonico contra illos, qui apologias texere, vel dicere audent adversus judicium latum super facto dogmatico, Inquit enim; (a) *Eos appellarem temerarios, superbos, & inobedientes. Temerarios, quia judicio lato refragantur. Superbos dicerem, quia in hujusmodi factorum doctrinarum cognitione se se perspiciores universa Ecclesia judicarent, Demum ceu inobedientes damnam, quippe qui judicio Ecclesiæ, quæ in censura, & damnatione librorum Spiritus Sancti lumine ad eorum prævum sensum, erroresque cognoscendos illustratur, ac regitur, pervicaciter morem gerere* des

(a) Tom. 1. hist. eccl. colloq. 2. in fin.

detrectarent . Quocirca jure optimo castigari deberet audacia quorundam . . . Sane si a judicio factorum doctrinalium ab Ecclesia lato semel impune resilire liceat , poterit quilibet pro omnibus hæreticis ab Ecclesia confixis apologias concinnare . Periclitabitur infallibilis Traditionis auctoritas , quæ pendet e sensu librorum SS. Patrum ab Ecclesia Catholica præfixo . Non poterit Ecclesia comprimere tumultus , & contentiones , quæ sæpius suboriuntur occasione sensus librorum , nec sanam doctrinam a falsa & noxia , quæ in libris continetur , certo valebit discernere . Ecclesiæ itaque judicio in factis doctrinalibus , tamquam sacræ anchoræ indivulse adhærere debemus . Et de hoc satis ,

Dixi , & pro veritate dixi : non adulationis astu ; non dissimulatione veri ; non mendacii technis , ut verum cum falso confunderem , aut difficultates effugerem , Ita plane censuimus , dicendum esse , ne quum astruimus infallibilitatem judicii de rebus Fidei & morum , nec non de Facto Dogmatico , in Romano Pontifice , universam Ecclesiam pro suo munere , & officio docente : nec non ejusdem Pontificis superiorem auctoritatem Concilio adhuc

huc œcomenico , confestim omnia labefactare , ac destruere videamur , decidendo hanc eamdem auctoritatem , eundemque Summum Pontificem coactum esse pendere a consilio peritorum , & necessario simpliciter indigere eorum consultatione , antequam ad definitionis actum procedat . Sed quod mirum videri cuilibet est , cuncta ab adversario confici opinantium arbitrio , itaut uni placeat unum cœtum Consulentium designare , alteri diversum ; uni peritos quoslibet liceat constituere ; alteri sibi delectos constituere ; uni semel electos stabilire , alteri eosdem destituere , & alios substituere ac declarare ; perinde ac si Petri Cathedra hominum placito sit dimissa , ut ejus regimen formetur , aut deformetur , si ad suam excogitatam regulam non conveniat , vel in apice dissentiat . Neque deest , qui ad instar Nabuchodonosoris velit consilium adunandum , de quo scriptum est : (a) *Vocavitque omnes Majores natu , omnesque duces , & bellatores suos , & habuit cum eis mysterium consilii , dixitque cogitationem suam in eo esse , ut omnem terram suo subjugaret imperio . Et utique omnem terram subjuga-*
re-

(a) Judith. cap. 2.

rent, si suo hujusmodi opinantes Cathedram Petri subjicerent imperio.

Et qui estis vos, qui tentatis Dominum? (lubens (a) cum Judith exclamabo) quum Cathedram Petri hujusmodi opinionationibus nunc instructam, nunc destructam conspiciamus? *Non est iste sermo, qui misericordiam provocet, sed potius qui iram excitet, & furorem accendat.* Indignabatur generosa Judith, quia Ozias cum senioribus & populo oblitus Dei promissorum, atque beneficiorum sponpondit tradere civitatem Assyriis. *Et dixit illis, quod est hoc verbum, in quo consensit Ozias, ut tradat civitatem Assyriis, si intra quinque dies non venerit nobis adiutorium?*

Mire ad rem nostram. Instituit Christus Petrum Summum Pontificem, Pastorem, ac Doctorem summum, quin scateat conditio, aut medium designatum tamquam simpliciter necessarium, ut pascat, & doceat actu. Missurum Spiritum Sanctum, ut doceret nos omnia, promisit Christus, & solvit. Petrus, ut Organum Spiritus Sancti docet res Fidei (b) & mo-

(a) Cap. 8.

(b) Act. 15.

morum, indictumque a Deo est populis, & gregi, ut audiat illum, & credat. Quid ultra tentatis Dominum? Quid ultra excogitatis, ut hanc Cathedram Petri tradatis hæreticis contemnendam, ac deridendam?

Ultero pergamus. Petrus alioquin sibi par ad decidendum super usu legalium, ut constet ex ejus data sententia, cui omnes omnino consenserunt, attamen cogit Concilium (a) Jerosolymis de verbo hoc loquuturus. Idem exemplum dedimus in Leone Magno. Quorsum hæc? Nisi ut discamus, adesse Ecclesiæ Christum, & in suis promissis fideliter persistere, mittendo Spiritum Sanctum, ut doceat & veritatem & modum definiendi. Quo fit, ut, citra necessitatem simpliciter talem, & dirigat Petrum, ut cogat Concilium ad ferendam de re conquisita sententiam, & assistat Sancto Leoni, ut adversus Eutychen judicium ferat per dogmaticam Epistolam.

Quid ultra tentatis Dominum? Per mille, & septingentos annos hac methodo directa est Ecclesia in veritate incorrup-

(a) Act. 15.

rupta, immobilis in Fide; adhuc quando, ex improba temporum conditione fuerat locus timori. Ubi autem in posterum ad omnes casus minime futuros, neque possibiles contremiscere est opus; perinde, ac foret periculum in januis, ne scilicet Pontifex temere, ac errando pronunciet? Nequaquam est id possibile, quia Deus fidelis est, Docuit, & docebit usque in finem omnia, etiam si opus est impellendo Pontificem ad ea media comparanda, prout res Fidei postulat. Dono consilii ornatus discernet, si opus sit; consulentes adhibere, nec ne, more Petri, more Magni Leonis, ne arrogantia, præsumptio, vel error unquam admisceatur, & in Spiritum Sanctum resiliat.

Aget certissime Pontifex quod in se est, ex directione Spiritus Sancti, citra necessitatem ab opinantibus injectam; quum agendum illi erit ad doctrinam toti Ecclesiæ tradendam. Sed sibi minime blandiatur hoc simile promissum esse in cæteris, quæ ad definitionem ex Cathedra non collimant. Falleret hæc opinio. Ut doceat Pontifex omnia necessaria ad Fidem, adstiterus est Spiritus Sanctus, & quidem quum
do-

docturus est tamquam Petrus Ecclesiam. In cæteris dimissus est Pontifex consilio suo, ut humana prudentia usus, consultationes requirat, consiliarios advocet. Et si quidquam dispensatoria œconomia agendum est, quod citra definitionem proponitur indulgendum, caveat Honorium imitari; caveat imprudenter rescribere; atque inconsulte, ne pœnam Honorii subire cogatur. Audiat amplissimos Cardinales a divina providentia dirigere delectos adfidentes, & consiliarios; audiat doctos, & si fas est doctissimos, ubi, & quando oportet, quia sic fecit Petrus, sic fecit Leo, cogendo Concilium; sic fecit Gregorius, cæterique doctiores Pontifices. No-
veritque quò magis solutus est a necessitate, eo magis discere oportere, ut integerrimus sit Doctor, & Judex. Sed sit absolutus a vinculo necessitatis absolutæ utendi alieno consilio; non autem a convenientia consilii: de quò dixi, iterumque dico; si sit de medio conducente ad judicium finale Fidei & morum, Deus dabit, modo pluries explicato; si sit de cæteris negotiis, ab humanis viribus petat subsidium, mediis opportunis consultationibus.

His

His coactus exemplis non diffitetur Auctor, (a) posse aliquando contingere defuturum medium exquirendæ consultationis. Sed tunc ait ad extraordinariam providentiam spectare, ut *judicii infallibilitatem, extra ordinem, ac præter solitum largiatur*. Ecquis hoc in animum inducet doctissimum Leonem Magnum proprio labore ac studio condentem sententiam dogmaticam adversus Eutychen, hæc factum esse infallibilitatem, extra ordinem, præter solitum; verbo; miraculose; per extraordinariam providentiam? Quinam testis producit? Ubi id legere est? Quænam alicujus ex Patribus, vel scriptoribus, a sæculo quinto usque ad hanc horam, sententia? Quæ animadversio, quæ cogitatio? Et nunc lubet ad extraordinariam providentiam, ad miraculum deducere promissam per Petrum, & in Petro specialem assistentiam Spiritus Sancti, quum docturus est universam Ecclesiam; ut absoluta necessitas petendi consilium nullo fulta argumento firmetur? Omnia tandem capita præsentis dissertationis verbis

Augu-

(a) Pag. 51: init. & in iter. def. pag. 108.

Augustini concludamus : (a) Nulli dubium est , gemino pondere nos impelli ad discendum , auctoritatis , atque rationis . Mibi autem certum est , nusquam prorsus a Christi auctoritate discedere ; non reperio valentior . Christus dixit soli Petro : *Pasce oves meas : Pasce agnos meos* . Et satis est . Idcirco monitum ejusdem Augustini pro Coronide subjiciam : (b) *Turbata est vestra inventio , jam tandem intentio corrigatur* .

F I N I S .



(a) Contr. Acad. l. 3. c. 20.

(b) Contra Julian, libr. 2. oper. imperser. n. 205. in fin.

ERRATA :**CORRIGE :**

Pag. 28.lin.13. confluatur

conflatur

Pag. 47.lin.19. questio

quæstio

Pag. 47.lin.20. nempe ne

nempe an

Pag. 50.lin. 9. asseruir

assuit

Pag. 74.lin. 1. ut non sit

ut ut sit

Pag. 74.lin.23. fuerat

fuerant

Pag. 79.lin. 7. ex Bernardo

Ex D.Bernardo

Pag. 87.lin.20. pro orbem

per orbem

Pag. 87.lin.21. per consilio

pro consilio

Pag.118.lin.10. ed quibus

de quibus

REIMPRIMATUR.

*Fr. Silvester Martini Ord. Prædic. Inquisitor
Generalis Mediolani &c.*

*Franciscus Curionus pro Eminentiss. & Reveren-
diss. D. D. Card. Archiep.*

*Attenta adversa valetudine Egregii Provincialis
Carlii Bersanus pro Excellentissimo Senatu .*





